

Him Yaaim Me Jisas Krai Mak Kewisim Mau Tiwei

Menmen mekre tiwei ik

Him me Jon Baptais 1:1-8

Jon kikir Jisas keriuwe tipar 1:9-11

Seten kakri han ke Jisas 1:12-13

Jisas katip him yaaim keit Galili 1:14-9:50

Jisas ken Jerusalem katip him yaaim 10:1-13:37

Mit newenkek Jisas kaa 14:1-15:47

Jisas pike kekrit mit nirek 16:1-18

Jisas pike ken wit Heven 16:19-20

Jon kerek kikir mit neriuwe tipar hirak katip mit him me God

(Mt 3:1-12; Lu 3:1-18; Jo 1:19-28)

1 ¹Him im hiram him yaaim me Jisas Krai God Nikan kirak. ²“Nipaa Aisaia kewepyapir him me God hirak kewisim mau tiwei hiram matip mar im:

“God katip mitik hirak kehimitanek kar ik:

‘Hi ariuwet mitik kai kaktip him mai kakininit kakno kaknetit yayiwe.’

³ ^bMitik hak keit wit weinik mit ap newik hirak kinap katip hisiuwe kar ik: ‘Yi eiriak yayiwe yaaim me Mitik Iuwe te hirak kakisesim werek.’”

⁴“Hirak mitik niuk mirak Jon. Hirak kikir mit neriuwe tipar. Hirak kan kepu yaank weinik kewepyapir him me God katip kar ik: “Yi kerek yi eiweikin sip eiwet menmen enum, yi einen in hi akiri te God kakisak menmen enum yi yiriakem.” ⁵Hir mit nerer wit wit ne provins Judia, hir netike mit yapirwe ne wit Jerusalem hir nan nirek. Hir newepyapir menmen enum hir niriakem, te Jon kikiri nekre mani Jodan.

^a 1:2 Mal 3:1; Mt 11:10 ^b 1:3 Ais 40:3 ^c 1:4 Ap 13:24, 19:4

^{6d}Jon kamir tepnek me kamel mit niriakem mar ke laplap, hirak kamir yink ke kamel kire henpen kau tu. Hirak kaam weise metike manu nikim meit yaank. ^{7e}Hirak katip mit miyapir him kar ik: “Maain mitik hak kakikrehir kai. Hirak Mitik Iuwe kinina. Hi ap Mitik Iuwe har ke hirak au. ⁸Hi epei hikiri yekre tipar, te maain hirak kakwis God Himin Yaaik kakikre han ki.”

Jon kikir Jisas

(Mt 3:13-17; Lu 3:21-22)

⁹Me wi im Jisas kinaaiwir wit Nasaret keit provins Galili hirak kan kiun mani Jodan. Hirak kan kiun mani Jodan, Jon kikirek keriuwe tipar. ¹⁰Hirak kinaaiwir tipar kehini kiniu ken tenhaan eik, Jon kir nepni hiremes mewep mire weipir, God Himin Yaaik kire hore tapi kekiuwe kan kewik. ^{11j}Te Mitik Iuwe keit God katip him hiram meke nepni man matip mar im: “Ti Nikan kai hi hanhanit. Hi han yaaik heriuwit.”

Seten kari han ke Jisas

(Mt 4:1-11; Lu 4:1-13)

^{12g}Wasenum, God Himin Yaaik keriuwet Jisas hirak ken yaank weinik. ^{13h}Hirak kepu ein me wi 40, te Seten kari han kirak. Jisas ketike miyak me yaank nepu ein. Mit ensel ne wit ke God hir nan nekepek.

Jisas katip mit miyapir him me God keit Galili

(Mt 4:12-17; Lu 4:14-15)

¹⁴ⁱMaain mit han newis Jon kekere winak enuk ke gavman. Me wi im Jisas kan provins Galili katip mit miyapir him me God. ^{15k}Hirak katip kar ik: “Wi epei man menep te God kakinin naanmampri yi mit miyapir ne ti. Yi eiweikin sip eiwet menmen enum yi eiymtau him me God eiysesim.”

Jisas kenine mitikit tekyait (4) hirakit tatisesik

(Mt 4:18-22)

¹⁶Jisas keke ti kesiurir wan ken pin, hirak kir Saimon ketike nikik kirak Andru. Hirakit tewir hepin iuwe men mekre wan. Hekrit hekrit hirakit tari saauk. ^{17l}Jisas ketpiwekit kar ik: “Yi eitikewa haiu mamno, hi eteikni menmen te yi eiri han ke mit hir nanises him mai.” ¹⁸Wasenum hirakit tinaaiwir hepin mirakit, hirakit tisesik.

¹⁹Jisas ken kike, hirak kir Jems ketike nikik kirak Jon, hirakit nikerek hirakit wik te mitik niuk mirak Sebedi. Hirakit tau bot kirakit tekerwo

^d 1:6 2Kin 1:8; Mt 11:8 ^e 1:7 Ap 13:25 ^f 1:11 Sam 2:7; Ais 42:1; Mt 12:18; Mk 9:7

^g 1:12 Mt 9:13 ^h 1:13 Sam 91:11-13 ⁱ 1:14 Mk 6:17 ^j 1:14 Jo 1:43 ^k 1:15 Mt 3:2; Ga 4:4 ^l 1:17 Mt 13:47

hepin mirakit. ²⁰Hirak keninewekit, te hirakit tinaaiwir haai kirakit hirak kau kekere bot ketike mit han kerek hir nekepek nekerwo hepin, hirakit ten tises Jisas.

Jisas kepir herwe enuk kenepin kekeipin mitik hak

(Lu 4:31-37)

²¹Hirakit tisesik, te hir nen niun wit Kapaneam. Hir nepu wit Kapaneam, maain wi Sabat epei man, hirak Jisas ken winak kerek mit nererik nekine him me Moses neitai, hirak katip mit miyapir him mirak. ²²Hir nemtau him mirak, te hir han kekrit neriuwe menmen hirak ketpim. Hirak ap ketpor kar ke mit kerek ninin nertei him me Moses netpim. Au, hirak katip kar ke Mitik Iuwe Kraiss kerek God keriuwetek kan kekepi kerekek.

²³Me wi im, mitik enuk herwe kau kekrerek hirak kepu winak ik. ²⁴Hirak kinap katip kar ik: "Jisas ke wit Nasaret, ti han herekyei mekam a? Ti han te hewep a? Hi herteiyit. Ti Mitik Yaaik Iuwe ke God." ²⁵Te Jisas kenerek ketpiwek kar ik: "Herwe enuk ti ekintip wire wire ti enepin ekeipin mitik ik etpaan eno." ²⁶Jisas katip kar ik, herwe enuk ketenenik te hirak keperper kenepip him iuwe, herwe ketpaan kenpin kekeipniwek. ²⁷Mit miyapir nir menmen im hir nepirpir nitehiyan nar ik: "Mekak ik. Hirak ketpai him ham yaaim. Hirak kire Mitik Iuwe hirak katip herwe enun hir nemtau him mirak hir nisesim." ²⁸Te waswas hir mit miyapir natipan menmen Jisas kirkakem te mit nerer wit wit neit provins Galili hir nertei Jisas.

Jisas kikaap pita maam pirak hire yaaip

(Mt 8:14-15; Lu 4:38-39)

²⁹Jisas kinaaiwir winak eik e, hirak ketike mit nirak nen winak ke Saimon ketike Andru. Jems ketike Jon hirakit ten tetikeri. ³⁰Saimon maam pirak (miye pe mite pirak) hire winap wiwaai yeno hire yink sisi. Hir natip Jisas hire winap. ³¹Te Jisas ken kirep ketenen his mire kika hire wekrit werp, hirak ketpiwe kar ik: "Ti hinap epei au." Te yink sisi epei au, hire yaaip. Hire yaaip te hire wemani menmen hir nanim.

Jisas kikaap mit miyapir yapirwe hir nire yaain

(Mt 8:16-17; Lu 4:40-41)

³²Maain wepni kewen ken, hir mit nerer wit wit neriyei mit miyapir hir ninap, hir netike mit miyapir han kerek herwe mekreri, hir neriyei nen nir Jisas. ³³Mit miyapir yapirwe ne wit iuwe ik nen nererik nau

^m 1:21 Mt 4:13 ⁿ 1:22 Mt 7:28-29 ^o 1:24 Mk 5:7 ^p 1:26 Mk 9:26 ^q 1:28 Mt 4:24
^r 1:32 Mt 4:24

menep weipir ke winak. ³⁴ Jisas kikaap mit miyapir kerek hir ninap te hir pike yaain. Mit han hirak kepir herwe enum menpin mekeipnor. Hirak katip herwe hir ap enweyapirek hirak keimin au emit! Hir nerteiyek hirak Nikan ke God.

Jisas kiriak menmen kerer wit wit ke provins Galili

(Lu 4:42-44)

³⁵ Hekrit enum eik hirak kekrit ketpaan ken yaank weinik kitehi God, te hirak ketikerek tewepnak. ³⁶ Maain, Saimon ketike mit han nepu netikerek, hir nen nisesik. ³⁷ Hir nen ninapinek hir netpiwek nar ik: “Mit miyapir yapirwe hir nan ninetnut.” ³⁸ Hirak ketpor kar ik: “Emit! Haiu wen emno wit ham menep te hi hatip mit miyapir him mai heitai en.” ³⁹ “Te hirak ken heriyai heriyai me provins Galili, hirak katip mit miyapir him mirak keit winak kerek mit nererik nekine him me Moses neitei. Hirak kepir herwe enum mau mekre mit miyapir hiram menpin mekeipnor.

Jisas kikaap mitik enuk lepro mewik hirak kire yaaik

(Mt 8:1-4; Lu 5:12-16)

⁴⁰ Mitik enuk lepro mewik hirak kan kewen ninip kitehi Jisas kar ik: “Mitik luwe, ti hanhan eriuwa te ti ekepa hi are yaaik.” ⁴¹ Jisas hirak hanhanek te hirak kewis his menterik ketpiwek kar ik: “Hi hanhan ti are yaaik.” ⁴² Hirak katip epei au, in ek lepro menke menpin mekeipniwek hirak kire yaaik. ⁴³ Jisas ketpiwek him manp te hirak keriuwetek ken wasenum. ⁴⁴ Jisas ketpiwek kar ik: “Ti emtewem. Ti ap etip mitik hak menmen im. Au, ti eno eteikin mitik pris yink kit. Te ti ewetiwek menmen nipaa Moses ketpai haiu mamwet God em, te mit hir nanirte ti pike ere yaaik.” ⁴⁵ Te mitik ik kemtau him me Jisas au. Hirak kewepyapirem heriyai heriyai, te maain Jisas ap kakno kakitet witeik au. Hirak kiriakem te mit nanirek hir han yaaik nanirp nanweikniwek. Te hirak kerp pin eik, mit nerer wit wit hir nan nanirek.

Jisas kikaap mitik his hit enum hirak kire yaaik

(Mt 9:1-8; Lu 5:17-26)

2 ¹ Maain wi ham, hirak pike kan wit Kapaneam. Mit en nertei hirak pike kan kepu winak kirak. ² Hir nertei hirak kepu, te hir yapirwe nen nererik ere winak kenempet keriuweri. Mit han nerp ya weipir menep hir nemtau Jisas ketpor him me God. ³ Hirak wen ketpor him, mitikit tekyaaait ten tekerir mitik kiwaai kentar kinaan. Hirak his hit maa

^s 1:34 Mk 3:11-12 ^t 1:35 Mt 14:23; Mk 6:46 ^u 1:39 Mt 4:23, 9:35 ^v 1:44 Mk 3:12, 7:36; Lev 14:1-32

tupe tupe meit. Hirakit tan tatir Jisas tewep mit yapirwe nerp neiyepet weipir, te hirakit ap tatno nimin taau. Te hirakit tehin tiniu leta me winak pinak ein. ⁴Hirakit tehin tiniu winak ten niu ein, hirakit tenke toni kiwapin winak siup kerek Jisas hirak kerp ketin ni en. (Mit ne Juda hir newis toni kiwapin winak siup. Nipin au. Wit hirak tenhaan weinik, hir niu auri.) Hirakit tenke toni ere kihi wisenuk kepeit, hirakit tinaaiwir kinaan kerek mitik kiwaai kekrerem men ti. ⁵“Jisas kertei hirakit tetike mitik kiwaai kinaan han kitet hirak kakikepik, hirak ketpiwek kar ik: “Mitik, hi esak menmen enum mit hiram mamno.”

⁶Hirak katip kar ik, te mit han kerek ninin nertei him me Moses natip mit miyapir em, hir nau neit en hir han kitet nar ik: ⁷“Ko! Kenmak hirak katip kar ik? Hirak katip enum kekrehir ke God. Hirak kire God te hirak ketpim a? God kerekek kakisak menmen enum mamno. Mit taauye!” ⁸Jisas kertei kekere han kirak hir han kitet nar ik, te hirak ketpor kar ik: “Yi ap han ekitet menmen mekre han ki mar im au emit! ⁹Hi atip mitik kiwaai kentar kinaan, ‘Hi esak menmen enum nipaa ti hiriakem hiram mamno,’ yi yepitari hi atip werek auye. Te hi atip mitik, ‘Ti ekrit etenen yeno eyim eno, hirak kakikrit kakno, yi eyirtei hi atip werek te hi esak menmen enum me yi mit. Hi etpi mekam te yi han ekiteta?’ ¹⁰Hi tewen etpiwek har ik: ‘Ekrit eno,’ te yi eyirtei hi Mitik ke wit ke Mitik luwe hi esak menmen enum yi mit ne ti yi yiriakem.” ¹¹Hirak ketpor epei au, hirak katip mitik kiwaai kekere kinaan kar ik: “Ti ekrit etenen kinaan mit eyim eno witeik.” ¹²Hirak katip epei au, te mitik kehin kekrit ketenen kinaan mirak kewepi ken witeik. Mit nirek, te hir nepirpir newenipi God Hirak luwe, hir natip nar ik: “Hiau mir menmen yaa'im mar im nipaa ein auye.”

Jisas kenine Livai hirak kisesik

(Mt 9:9-13; Lu 5:27-32)

¹³Maain Jisas pike kitet tenhaan ken wan ke Galili, mit nen nererik te hirak ketpor him me God. ¹⁴Hirak wen kitet tenhaan hirak kir Livai, hirak nikan ke mitik Alfias, hirak naanmipre winak ke mit hir newir pewek me takis. Jisas kerek ketpiwek kar ik: “Ti etikewa hawir wariyakit wauno te ti ehises him mai.” Livai kekrit kisesik ketikerek ten.

¹⁵Maain Jisas kau winak ke Livai. Mit yapirwe enun kerek hir neit takis nekintip pewek ham nisawinem, hir nen netike mit kerek niriak menmen enum hir naam menmen netike Jisas ketike mit nirak disaipel kerek nises him mirak. ¹⁶^zIn ek mit han nepu, niuk mir Farisi, hir ninin nises him me Moses. Mit han nepu niuk mir Skraip. Hir ninin nertei him me Moses natip mit em. Hir nir Jisas ketike mit naanmipre pewek me

^w 2:5 Lu 7:48 ^x 2:7 Ais 43:25; 1Jo 1:9 ^y 2:14 Jo 1:43 ^z 2:16 Mt 11:19; Lu 15:1-2

takis netike mit kerek hir niriak enum, hir yapirwe newepnak nekiyan naam menmen. Hir mit Skraip natip Jisas disaipel nirak nar ik: “Kenmak hirak kipaam menmen ketike mit nari pewek me takis netike mit niriak menmen enum a?”¹⁷ Jisas kemtau him mir, te hirak ketpor kar ik: “Mit ninap nanino nanir mitik dokta. Mit hir manpenun neit taau. Hi epei han ti hari han ke mit hir niriak enum. Mit kerek hir han kitet hir yaain au.”

Jisas katip me him ham yaaim

(Mt 9:14-17; Lu 5:33-39)

¹⁸Maain wi ham mit nises him me Jon netike mit ne Farisi hir han tewenin menmen me God yaaim, te hir nanit ninpi nanu. Mit han niri te hir nan nir Jisas nitiwekhi nar ik: “Mit ne Jon netike mit ne Farisi hir nanit ninpi nanu. Nenmak te mit nises him mit niriakem au?”¹⁹ Jisas ketpor tok piksa kar ik: “Mit nanit ninpi nanu nantike mitik epei keit mite a? Taauye! Hir han yaaik nanim menmen nantikerek.”²⁰ Maain wi ham hir mit han hir nantiwekhis neiyik nanino, te hir mit nirak nanit ninpi rek nanu.”

²¹Hirak wen ketpor tok piksa kar ik: “Mit hir ap nekerwo laplap ham kike yaaim mentir ham enum tokim au. Hir nekerwewim, maain hir nankemyet laplap hiram mamno mamre kike mamri laplap tokik mamwepim.”²² Mit hir ap newen tipar wain wen petep mekre meme hiyei tokim auye! Hir nanwenem te wain tiwerpek mamniu, hiyei tokim mamwep te wain mamwen mamno ti, hiyei enum mamwep mamit. Au, mit newen wain wen petep mekre meme hiyei wen yaaim nimnam.”

Him me wi Sabat

(Mt 12:1-8; Lu 6:1-5)

²³Maain wi sabat ham, Jisas hirak ketike mit disaipel nirak hir nen nitet ni ham. Mit nirak newen wit yehes miram nehis newenem hir naam.²⁴ Mit ne Farisi kerek ninin nises him me Moses hir natip Jisas nar ik: “Ko! Nenmak te mit nit niriak menmen im enum a? Nipaa God kewet Moses him lo me wi Sabat, te haiu metput me mit nit hir newen wit yehes au emit.”

²⁵^bJisas hirak ketpor kar ik: “Yi ap han kitet werek menmen yi yekinaam me him me maam kaiu Devit a? Nipaa hirak ketike mit nirak ninpi maan te hir naam menmen nar ke haiu mit in ek epei maam. Te yi wen yepitari hir niriak enum au, yaaim ye!²⁶ Abaiata hirak wen mitik hetpris naanmpre winak ke God, hirak Devit ketike mit nirak nen winak eik nimin ein naam bret tokim mit newisim me God miwaai mensiu kinaan menep. Mit naanmpre menmen me God, hir keriyen naam bret

^a 2:23 Diu 23:25 ^b 2:25 1Sml 21:1-6 ^c 2:26 Lev 24:5-9

tokim mirak. Mit han au. Him me Moses matip emit, te hirak Abaiata kewet Devit ketike mit nirak em hir naam. ^{27d}God kinin kiriak mit. Hirak hanhani, hirak kehimitan wi sabat hiram mamkaap mit keriyen. ²⁸Hi Mitik ke wit ke Mitik Iuwe hi Mitik Iuwe, hi hinin menmen me wi sabat.”

Me wi Sabat Jisas kikaap mit his enum

(Mt 12:9-14; Lu 6:6-11)

3 ¹Maain Jisas pike ken winak kerek mit nererik nekine him me Moses neitai en. Mitik enuk his miutip meweikin hirak kau ein. ^{2e}Mit han hir nipirek hirak kakikepik me wi Sabat te hir nenerek nansiuwek him nanriyaak kakno winak enuk. ³Jisas katip mitik his enuk kar ik: “Ti enen in.” ^{4f}Hirak epei kan, Jisas katip mit kar ik: “Me wi Sabat him me God kerek Moses kewisim mau tiwei hiram mewisai hiau miriak menmen yaaim o enum? Hiau emkaap mit o hiau emnip?” Hir au nekintip neit. ^{5g}Hirak kiwaainaan kiri kentaantiwo han enuk kentar hir mit han toenuk. Hirak katip mitik his enum kar ik: “Ti esiuwe his emnen.” Hirak kesiuwehis mirak te his pike mire yaaim. ^{6h}His mire yaaim te mit ne Farisi hir nen witeik nen nererik netike mit kerek nises him me mitik iuwe King Herot, hir nimenipin Jisas nankip.

Mit yapirwe nises Jisas

⁷Jisas ketike mit disaipel nirak hir nen wan eik. Mit yapirwe ne provins Galili hir nisesik nen nererik netike mit ne Provins Judia, ⁸ⁱIdumia, wit yapirwe ke mani Jordan pinak ein, wit Taia, wit Jerusalem ketike wit Saidon. Hir yapirwe nemtau menmen Jisas epei kiriakem, te hir nan nanirek. ^{9j}Hir epei nan, Jisas katip mit nirak kar ik: “Yi yayit bot eiyik einen eiteninek te mit ap nanipira hi ankewin hir nanintirira.” ^{10k}Nipaa Jisas kikaap mit miyapir yapirwe ninap hir nire yaain, te in ek mit yapirwe ninap newep mit hir nan nerp menep newis his mentar Jisas, te hir nire yaain. ^{11l}Hirak ken kitet ein ein, herwe enun nirek nitehir nau ti nenepip nar ik: “Ti Nikan ke God.” ^{12m}Te Jisas ketpor him manp hir ap nanwepyapirek au emit!

Jisas hirak kehik mit disaipel nar hiswiyen wik

(Mt 10:1-4; Lu 6:12-16)

¹³Maain Jisas kehik mit kerek hirak hanhani keninor hir nan nisesik netikerek nen nau miniu (o neiyip) kentir ein. ¹⁴Hir nau ein, hirak kehik mit hiswiyen wik (12) hirak kewep niuk kenewor niuk mir “Aposel.” Hekrit hekrit hir netikerek nanriyan nanisesik nanimtau him mirak.

^d 2:27 Diu 5:14 ^e 3:2 Lu 13:14 ^f 3:4 Lu 14:3 ^g 3:5 Jo 11:33, 12:40 ^h 3:6 Mt 22:15-16
ⁱ 3:8 Mt 4:25 ^j 3:9 Mk 4:1; Lu 5:1-3 ^k 3:10 Mt 14:36 ^l 3:11 Lu 4:41 ^m 3:12 Mk 1:34

Maain hirak kakriuweti nanino nantip mit miyapir him mirak. ¹⁵Maain hirak kakriuweti kakwisi hir nepir herwe enun nanino nankeipin mit. ¹⁶"Im em hiram niuk me mit hirak ketorhis keriyei netikerek: Saimon (hirak kewis niuk mirak ham Pita), ¹⁷°Jems, ketike nikik kirak Jon, hirakit nikerek te Sebedi (Hirak kewis niuk mirakit wik Boanesis kentar hirakit tatip him iuwe mire nepni mewenin). ¹⁸Hirak wen kehimitan Andru, Filip, Batolomyu, Matyu, Tomas, Jems hirak nikan ke mitik Alfias, Tadias, Saimon Selot, ¹⁹hir netike Judas ke wit Iskeriot kerek kewepyapir Jisas te mit enun nepan nirak neiyik nen nakip.

Mit natip Bielsebul kikaap Jisas kepir herwe enun nekeipin mit
(Mt 12:24-32; Lu 11:14-23, 12:10)

²⁰°Jisas kehis mit hiswiyen wik (12) epei au, hirak ken winak kirak eik. Hirak ken winak, mit yapirwe nererik winak kirak te hirak ketike mit disaipel nirak ap te nanim menmen taau. ²¹°Maain miye pirak wetike kikrek tirak hir nerteiyek, hir nen nare nantiwekhis nanriyaak neiyik nanino nir ein nentar hir han kitet hirak han ken sip hirak ketaritari. ²²°Mit kerek ninin nertei him lo me Moses natip mit miyapir em, hir ninaaiwir wit Jerusalem nekiuwe nan natip nar ik: "Herwe enuk niuk mirak Bielsebul hirak kersis Jisas te hirak Seten kewis Jisas hirak kinin herwe enun kepiri nanino nankeipin mit." ²³Jisas kertei menmen hir netpim te hirak kenine mit ein hir nan nerp menep in, hirak ketpor tok piksa kar ik: "Seten kenmak te hirak kepir herwe nirak nekeipin mit a? Taauye! ²⁴Mit ne wit hak hiras naninepan, te hir nankiyan nantike mit han ne wit hak naninepan taauye! ²⁵Mit ne weiwik miutip hiras naninepan te hir nanirkeik te hir nankiyan nanu nanit? Au, hir naniwaank hiras. ²⁶Seten hirekes kepir herwe nirak nankeipin mit, hir naninke hasini naniwaank hiras. ²⁷Hi hinin Seten hi epir herwe nirak nekeipin mit, hiram mar ke mitik hak kinin kakno kakwep wepir kaksenkek mitik enuk yehes enum o mitik iuwe, te hirak kakit menmen mirak meit winak eik keiyim kakno.

²⁸"Hi etpi werek. Menmen enum mit niriakem metike him enum hir netpim hirak God kakisakem han ekitetim au. ²⁹Te mit natip enum me menmen God Himin Yaaik kiriakem, hirak ap te kakisakem taau! Hiram mamu mamit tipmain tipmain enum eik." ³⁰°(Jisas katip him im kentar mit han ne Jerusalem hir natip nar ik: "Herwe enuk kersisek kekepek te hirak kepir herwe enun nekeipin mit.")

° 3:16 Jo 1:42 ° 3:17 Lu 9:54 ° 3:20 Mk 6:31 ° 3:21 Jo 10:20 ° 3:22 Mt 9:34, 10:25
° 3:30 Jo 10:20

Neimin hir ne weiwik me Jisas

(Mt 12:46-50; Lu 8:19-21)

³¹ Hirak katip epei au, Jisas miye pirak wetike kikrek tirak nan nerp witeik neninewek. ³² Mit nau neit nimin nemtau hir neninewek, hir netpiwek nar ik: “Miye pit wetike kikrek nit hir nerp witeik neninut.” ³³ Jisas ketpor kar ik: “Neiyin hir nire miye wetike kikrek nai?” ³⁴ Hirak kiwaainan kir mit nau menep te hirak katip: “Mit in hir nire miye wetike kikrek nai. ³⁵ Mit kerek nemtau him me God nisesim, hir keriyen nire miye wetike kikrek o yenterer nai.”

Jisas katip tok piksa me mitik kamir wit yehes mau ni

(Mt 13:1-9; Lu 8:4-8)

4 ¹ Jisas pike ken wan ke Galili kerp تنهاان eik katip mit him me God. Hirak kepu ein, mit yapirwe nan nererik nanimtau him mirak. Hir nerp menep menep nersis Jisas, te hirak ken kau bot kiwaai kentar wan menep تنهاان. Mit yapirwe nau تنهاان nemtau him mirak.

² Hirak ketpor tok piksa kar ik:

³ “Yi eiyimtwem! Hirak mitik hak ken kewir yehes meit ni mirak. ⁴ Hirak wen kewirem, ham menke miwaai yayiwe, hore meniuwe man maam. ⁵ Yehes ham hiram menke miwaai ti kentar nan mewo waswas mekre ti kike. ⁶ Maain, wepni iuwe kan kamip, hiram meweawei maa keremem. ⁷ Yehes ham menke miwaai ti kerek nipaa waai enum tik tik mewiyen. Maain, waai enum tik tik pike mewo miwapinem, te hiram ap mari au. ⁸ Yehes ham menke miwaai ti yaaik nipaa mitik kewenek. Hiram mewo iuwe mari yapirwe. Ham mari 30, ham mari 60, ham mari 100.” ⁹ Jisas katip him mirak mikaru mar ik: “Neimin yi yertei him mai werek werek yi han ekitetim werek werek.”

Kenmak Jisas katip tok piksa

(Mt 13:10-17; Lu 8:9-10)

¹⁰ Maain, mit yapirwe epei nen, Jisas hirak kepu weinim ketike mit hiswiyen wik nirak (12) netike mit han disaipel kerek nemtau him mirak keriyen. Hir nepu nitiwekhi him me nipaa hirak ketpim. ¹¹ Te hirak ketpor kar ik: “God kewisi yi yertei menmen me hirak kinin naanmipre menmen karkeik. Nipaa God ap kewepyapirem, te mit hir nerteiyem au. Hi etpim hisawinem te yi mit keriyen yertei menmen me God. ¹² Mit han toenuk au. Hi etpim hisawinem hetpor te

hir enir menmen te hir ap nerteiyem, hir nemtwem te hir nerteiyem au. Hir nertei te hir neweikin han newet God em, God

[†] 3:31 Mk 6:3; Jo 2:12; Ap 1:14 [‡] 4:1 Mk 3:7-9; Lu 5:1-3 [‡] 4:2 Mt 13:34; Mk 4:33-34

[‡] 4:12 Ais 6:9-10; Jo 12:40; Ap 2:26-27

kakisak menmen enum hir niriakem. Hir nepitari menmen te hirak kakisak menmen enum mir au.'

Jisas kewepyapir him me tok piksa

(Mt 13:18-23; Lu 8:11-15)

¹³“In ek yi yepitari menmen im hi etpiyem hisawinem, te maain yi eiyirtei menmen ham hi etpiyem hisawinem mamirkeik? Taauye! Hi are ewepyapir im em, te maain yi eiyirtei him me God werek werek. ¹⁴⁻¹⁵Yehes miwaai yayiwe hiram mar ke mit hir nemtau him me God, te Seten kan keweiknor han kir hir han kaa him mirak. ¹⁶Yehes menke miwaai ti kike kentar nan hiram mar ke mit nemtau him me God hir han yaaik. ¹⁷^xYehes nekenik kike mewo mepu, maain wepni kamip hiram meweiwei maa hiram mire mit. Mar im hir nepu han yaaik, te maain mit hir han neneri newepnaki, hir han enuk naninaaiwir him me God mamit. ¹⁸Yehes miwaai ti nipaa waai tiktik mewi miwapin yehes hiram mar ke mit hir nemtau him me God. ¹⁹^yTe hir han kitet menmen yapirwe. Hir han yaaik nanit pewek yapirwe, hir hemkre menepam neriuwe menmen heriyai heriyai ere han kir kenke kenterim. Him me God mepu mekre han kir au, hir han kaa rem meit. ²⁰Yehes miwaai ti yaaim mari yapirwe, hiram mar ke mit nemtau him me God hir nisesim niriak menmen yaaim. Mit han kike, mit han iuwe, mit han wisenum.”

Him me si mit nisawinek kekre sar

(Lu 8:16-18)

²¹^zJisas hirak pike ketpor kar ik: “Yi yayit si te yi eisawinek ekikre sar o eknik yeno a? Taauye! Yi eiwisik ekintar yeno eku niu ekir. ²²^aMenmen yapirwe misawin meit, maain hiram pike mamu yaain mit nanirteiyem. Menmen ham yapirwe mit hir nehanem, maain hiram mamu yaain mit nanirteiyem. ²³Keiyin kakirtei, hirak kakimtwem.”

²⁴^bHirak wen ketpor kar ik: “Menmen yi eiyimtwem yi han ekitetim werek werek. Mar ke yi han kitet mit netike menmen hir niriakem, maain mar im God han kakiteti yi mit kakrekuyiem, te hirak kakriyaam wisenum. ²⁵^cMitik hak ketenen menmen, te God kakwetiwek menmen ham mamtikerem hiram yapirwe. Mitik hak au ketenen menmen kike, menmen mirak kike God kakriyaam mamno mamkeipniwek mamawaank mamit.”

Tok piksa me yehes mewo

²⁶Jisas wen katip: “Menmen God kiriakem kakri han ke mit te hir nanisesik, hiram mar ke mitik kamir yehes mau ni. ²⁷^dWitaan o wanewik

^x 4:17 Mt 26:31 ^y 4:19 Mt 19:23-24 ^z 4:21 Mt 5:15 ^a 4:22 Mt 10:26; Lu 12:2

^b 4:24 Mt 7:2 ^c 4:25 Mt 13:12 ^d 4:27 Je 5:7

hirak kiwaai o kiriak menmen, yehes mewo. Hirak kirem mewo, te hirak kepitari karkeik te hiram mewo. ²⁸Ti hirekes kenip yehes mewo men mine tiwei, maain heneik mewim hiram mamri mamine nikim miram. Mitik au, ti erekek kenip menmen mewo. ²⁹Maain yehes me nenhep maa, mitik kaknen kakwenem.”

Tok piksa me nu mastet
(Mt 13:31-32; Lu 13:18-19)

³⁰Jisas wen ketpor kar ik: “Hi etpi menmen God kiriakem kakri han ke mit kakriuwerem hiram mire mekam? Hi etpi him im. ³¹Yehes me nu mastet men ti mewo hiram kike kike. (Hiram mar ke God kinin naanmipre mit, te maain hir yapirwe nanirtei menmen mirak.) ³²Maain, hirak mastet nikik kakwo kakre iuwe, hirak kinin menmen mit namir mau ni eim, hirak ken niu kakwirir heneik mewik, te hore mamnen mamwik mamwis yaank mentar heneik mirak.”

Jisas katip mit him tok piksa keremem
(Mt 13:34-35)

³³Jisas katip mit yapirwe tok piksa mar im ere hirak keremir yinam au meit mentar hir ap nerteiyem wen au. ³⁴Hirak katip tok piksa mar im katip mit yapirwe rem keriyen. Te hirak ketike mit nirak nepu weinim, hirak kewepyapir menmen nipaa hirak ketpim kisawinem.

Jisas katip te yuwerep katin kike kike keit
(Mt 8:23-27; Lu 8:22-25)

³⁵Maain hinkewi menep kakre witaan, Jisas katip mit nirak kar ik: “Haiu emno emrekir wan emno pinak ein.” ³⁶Hirak ketpor, te hir netikerek wen nau bot ninaaiwir mit yapirwe nerp tenhaan. Mit nau bot ham netikeri nen. ³⁷Hir wen nepno ein, yuwerep kiniu kan keriuwet wan te tipar kehinhin kekre bot. ³⁸Jisas kiwaai kinatin kekre bot sip kirak kewis paan kentar yeno tap mirak. Mit nirak nan nekotitek netpiwek nar ik: “Haai, ti ap han kitetai au a? Haiu wan kiniu kakwep te haiu mami.” ³⁹Te Jisas kekrit katip wan yuwerep kewenek kar ik: “Hihe enuk ewaai ehit!” Hirak katip epei au, yuwerep katin kike kike, wan hihe enuk kiwaai keit. ⁴⁰Te Jisas katip mit nirak kar ik: “Yi yenmak te yi yinaain a? Yi ap han kiteta wen au a?” ⁴¹Hir nemtau him mirak, hir ninaain natipan main main nar ik: “Mitik ik hirak keimin? Hirak mitik kerekek? Hirak kertei kewen yuwerep wan hihe enuk kiwaai keit.”

^e 4:29 Joe 3:13; Rev 14:15

Jisas kepir herwe enuk kenpin kekeipin mitik

(Mt 8:28-34; Lu 8:26-29)

5 ¹Hir nau bot nerekir wan nen pinak ein, hir niun ti ke wit ke mit ne Gerasa. ^{2f}Jisas hirak kenke kinaaiwir bot kiun tenhaan ken pin eik, mitik hak kerek herwe enuk kersisek hirak kinaaiwir herwe hei kinik miniu (o neiyip), hirak kan Jisas. ³Mitik ik hekrit hekrit kepu kekre herwe hei kinik miniu (o neiyip). Mit han hir ap nenke sen nesenkekik neriuwerem in ek au. ⁴Hir nipaa nesenkekik neriuwe sen mau his hit mirak, te hirak au kari me his ketnim, hirak kewir nan kenemtin me hit. Mit han hir nepitari niriak menmen te hirak kire yaaik kau keit, taau. ⁵Hekrit hekrit witaan wepni, hirak kepu kepeit kepike herwe hei kinik miniu (o neiyip), hirak kenepip kenep hirekes keriuwe nan kerekir yink kirak.

⁶Hirak kir Jisas keperp ein, hirak kesiukin ken kewen ninip kitehir kewenipiyek kerp menep, ^{7g}hirak kenepip katip kar ik: “Ti Nikan ke Mitik luwe ti henmak te t!” ⁸Herwe kinapen kentar Jisas nipaa ketpiwek kar ik: “Ti herwe enuk enke enepin ekeipniwek.” ⁹Jisas kitiwekhi kar ik: “Ti ekine hirekes.” Herwe katip, “Hi niuk mai mit yapirwe hentar haiu herwe yapirwe mersisek.” ¹⁰Hirak kitehi Jisas him iuwe te hirak ap kakriuweti naninaaiwir wit ik au ekit!

¹¹Sak yapirwe meit miniu (o neiyip) eik maam menmen.

¹²Herwe nitiwekhi nar ik: “Ti eriuwetai haiu mamno mamikre sak.” ¹³Jisas hirak kewenhi te hir netpaan nirir nekeipin mitik ik, hir nen nekre sak. Sak yapirwe mar 2,000 hiram mirir mekiuwe miniu (o neiyip) men mamn wan tipar mekiuwe him yipir hiram maa meit.

¹⁴Mit kerek naanmipre sak hir nirir nen natip mit ne wit iuwe, mit ne wit kike me menmen im epei man. Hir nemtau menmen im, hir nan nanir menmen mit hir epei netporem. ¹⁵Hir nan nir Jisas ketike mitik nipaa herwe nersisek. Mitik ik hirak kau ti han yaaik, hirak epei keriuwet klos, te hir mit ninapen. ¹⁶Mit naanmipre sak wen netpor menmen hir epei nirem me mitik enuk ketaritari ketike sak. ¹⁷Hir nemtau menmen im, hir nitehi Jisas him iuwe hirak kaknaaiwir wit kir.

¹⁸Hir nitiwekhi nar ek, te hirak ken kau bot. Hirak mitik nipaa herwe nersisek kitehi Jisas, te hirak ketikerek tatno. ¹⁹Te Jisas ketpiwek kar ik: “Au, ti ehu in eno wit me mit nit eteiknor etpor menmen Mitik luwe hirak kerekyutem han teweninit kekepit.” ^{20h}Te hirak ken wit mar hiswiyen (10) niuk miram Dikapolis, hirak katip kewepyapir menmen Jisas kerekyiwekem. Mit en nemtewem hir nepirpir han yaaik han kitetim.

^f 5:2 Mk 1:23 ^g 5:7 Mk 1:24 ^h 5:20 Mt 4:25; Mk 7:31

Jisas kikaap mitik iuwe niki pirak wetike mite hire winen hemkre
(Mt 9:18-26; Lu 8:40-56)

²¹Jisas pike ken kau bot ketike mit nirak, hir nerekir wan nen pinak ein. Jisas kenke kinaaiwir bot pike ken kiun tenhaan eik, mit yapirwe nerp nererik neweikniwek kerp en. ²²Hir nerp nererik neweikniwek kerp en, mitik hak kerek naanmpire winak kerek mit nererik nekine him me Moses neitai, niuk mirak Jairas, hirak kan kenke kitehir kiwaai hit me Jisas, ²³ⁱhirak katip him iuwe kar ik: “Niki pai nepei menep wawi waunatin wauno. Ti enen etikewa euno ti ewis his menteriye te hire aure yaaip hire pike wawikrit wawu.” ²⁴Hirak ketpiwek, te Jisas ketikerek ten ein.

Hirak tetike mit disaipel nirak nen en, mit yapirwe nisesi nen nerp neweikin Jisas. ²⁵Mite piutip wises Jisas wetikeri, hire winap hekrit hekrit winen hemkre me tito mar hiswiyen wik (12). ²⁶Hire nipaa wen wir mit dokta yapirwe, hire wewir pewek wewetorem weiyim watin hirehes ere hiram epei au mesi. Te hir nertei nekepye au. Hire wen winap winen hemkre. ²⁷^jHire wemtau mit natip menmen Jisas hirak kiriakem, te hire wisesik. ²⁸Hire han kitet war ik: “Hi awis his mentar laplap mirak kerekek, te hi pike are yaaip.” ²⁹Hire wesiuwe his wewisim mentar laplap mirak, hemkre kire katin keit, hire wire yaaip. Te hire wertei hire winen hemkre epei au keit. ³⁰^kJisas hirak kertei menmen mirak yaaim iuwe minaiwirek men mikaap neimin, te hirak keweikin kiwaainaan kitehi mit kar ik: “Keimin ketenino laplap mai?” ³¹Mit nirak disaipel netpiwek: “Ko! Mit yapirwe neweikninit. Kenmak te ti hitorhi me laplap mit a?” ³²Au, Jisas wen kiwaainaan kakir keimin keteniniwek laplap. ³³Mite ip wertei hire epei wire yaaip, te hire wepirpir wan wenke witehir wiwaai hit me Jisas wewepyapir menmen hire wiriakem. ³⁴^lTe Jisas ketpiwe kar ik, “Mite, ti han kiteta hi ekepit, te ti ere yaaip. Nipaa ti hinap te in ek ti epei ere yaaip.”

³⁵Hirak wen ketpiwe, mitik Jairas mit nirak nan netpiwek nar ik: “Niki pit epei waa, henmak te ti eriyaam ektan Jisas? Ti ewisik kakno?” ³⁶Te Jisas kemtewem hirak katip mitik Jairas kar ik: “Ti ap enaain au. Ti han ekiteta kerekek.” ³⁷Hirak kewis Pita, Jems ketike nikik kirak Jon tetike mitik ik keretet, hirakit ten ein. Hirak kewen mit han au, hir nerp in. ³⁸Hirakit ten tipiu winak ke mitik ek, hirak Jisas kir mit hir nikitep nesikeyaanmi. ³⁹^mHirak ken winak ke nimin ein, hirak ketpor kar ik: “Yenmak te yi yikitep? Hire ap waa au, hire wiwaai kerepep.” ⁴⁰Hir nemtewek katip kar ik te hir nenwesisek enum enum nen. Te hirak

ⁱ 5:23 Mt 8:3; Mk 7:32 ^j 5:27 Mk 6:56; Mt 14:36 ^k 5:30 Lu 6:19 ^l 5:34 Mk 10:52; Lu 7:50, 17:19 ^m 5:39 Jo 11:11

keriuweti nen wit eik. Hirak ketike miye haai nire nen netike Pita, Jems, Jon neit haau me niki wiwaai weitai en. ⁴¹ Hirak keteneniwe his kiutip ketpiwe him me mit ne Isrel kar ik: “Talita kumi.” Haiu meweikin him haiu matip mar ik: “Niki kike hi hetput ti ekrit.” ⁴² Hire wekrit wasenum witet ein ein. (Nipaa ein hire wepu tito mar hiswiyen wik (12).) Hir mit nirep hire witet ein ein hir nenemyiwe naan natip: “Kol!” ⁴³ Jisas ketpor him iuwe te hir ap nanwepyapirek au emit. Epei au, hirak ketpor hir nanwetiwe menmen te hire wawim.

Mit ne wit Nasaret neweikin sip newet Jisas

(Mt 13:53-58; Lu 4:16-30)

6 ¹ Jisas kinaaiwir wit ik ek ken kiun wit kirak eik. Mit nirak hir nisesik. ² Hirak ken kiun witeik, maain wi sabbat ham, hirak ken kekere winak kerek mit nekine him me Moses neitai en, hirak katip mit miyapir him me God. Hir nemtewek, hir nehinhin natip nar ik: “Keimin ketpiwek him im te hirak ketpaiyem? Karkeik te hirak kertei menmen im? Hirak kiriak menmen yaaim nipaa haiu ap mirem au. ³ Mitik ik ek hirak kime winak kerekek. Hirak nikan ke Maria. Hirak heiyiwe ke Jems, Josep, Judas tetike Saimon. Yenterer nirak nau in netikewai. Hirak Mitik iuwe au. Hirak mitik weinik kepir ke haiu mit keriyen.” Te hir han toenuk neriuwerek nineinik. ⁴ Jisas ketpor kar ik: “Mitik hak katip mit menmen God keteikniwekem, niuk mirak iuwe men heriyai heriyai merer wit wit. Te niuk mirak ap iuwe keit wit kirak, o weiwik miutip mirak o miye haai kikrek o yenterer nirak au.” ⁵ Hirak ap kiriak menmen yaaim yapirwe nipaa mit ap nirem au, te hirak kewis his mentar mit ninap kekekepi hir nire yaain manpenuk neit. ⁶ Hirak kenke kekreri kentar mit in ap han kitetik.

Jisas keriuwet mit aposel nirak nar hiswiyen wik (12)

(Mt 10:5-15; Lu 9:1-6)

⁷ Hirak kari mit hiswiyen wik nirak (12) nau hirak ketpor menmen. Hirak ketpor menmen, hirak kenkeri keriuweti nire wik wik nen nerer wit wit. Hirak kewisi hir nekrehir kirak nepir herwe enun nanino nankeipin mit. ⁸ Hirak ketpor him iuwe te hir ap nanit menmen yapirwe neiyim nanino au emit! Pewek o wapnake o menmen au. Paap kerekek te hir neke ti neriuwerek. ⁹ Hir neriuwet su, te saket wik au emit, miutip keremem. Hirak ketpor kar ik: ¹⁰ “Me wi yi yaino yayu yayikre winak hak, yi ap yayim menmen eirer winak ham au emit. Winak kiutip kerekek ere yi yainaiwir wit yaino wit hak. ¹¹ Mit ne wit hak ap neriyi

ⁿ 5:41 Lu 7:14 ^o 5:43 Mk 1:44, 7:36 ^p 6:2 Jo 7:15 ^q 6:3 Jo 6:42 ^r 6:4 Jo 4:44

^s 6:5 Lu 4:40 ^t 6:7 Lu 10:1 ^u 6:8 Lu 10:4-11 ^v 6:11 Ap 13:51

mit naanmampri yayit winak kir nanimtau him mi au, yi einaaiwir mit in einepеп toni waniu (o win) mau hit mit, te yi yeteiknor hir niriak enum.”¹² Hirak ketpor epei au, hir mit nirak nen natip mit miyapir han him me God me hirak katip mit hir nanweikin sip nanwet menmen enum. ¹³”Hir nepir herwe enun yapirwe nekeipin mit, hir newen wel mentar mit ninap, te hir nire yaain.

Mit nenep Jon kerek kirkir mit, hirak kaa
(Mt 14:1-12; Lu 3:19-20, 9:7-9)

¹⁴”Mitik iuwe King Herot kinin naanmipre mit ne Isrel, hirak kertei menmen Jisas kirkakem kentar Jisas niuk mirak iuwe te mit hir nertei menmen hirak kirkakem hir netpim nerer wit wit. Te Herot kemtewek. Mit han natip nar ik: “Jon kerek kirkir mit neriuwe tipar hirak nepei kaa, te hirak pike kekrit kepu. Mar im te hirak kirkak menmen yaaim nipaa haiu mit ap mirem au.” ¹⁵Te mit han natip nar ik: “Hirak Jisas ik hirak Ilaisa kerekek.” Mit han natip: “Au, hirak kire mit profet nipaa natip him me God newepyapirem natip mit em.” ¹⁶Herot kemtewem, hirak han kitet kar ik: “Hirak Jon nipaa hi eriuwet mitik hak ken kerekir teruk kirak paan kewen keket, hirak pike kekrit kau keit.”

¹⁷⁻¹⁸”¹⁷Nipaa Jon hirak epei katip Herot kar ik: “Ti hewaank Herodias mite pe nikik kit ti hetuwe. Menmen im hiram ap yaaim au, hiram enum!” Herot han enuk keriuwet mit nirak hir netenen Jon nesenekik newisik kekre winak enuk kentar mite pe Herot nikik kirak niuk mirak Filip, hirak herot ketiwe. ¹⁹Herodias hire han enuk ware waunep Jon, te hire taau. ²⁰Herot kinaain Jon. Hirak kertei Jon mitik yaaik kises him me God. Te Herot naanmiprewek. Wi kerek herot kemtau him mirak hirak kinaain. Te hirak wen pike hanhan kakimtau him mirak kakteipim kerekek.

²¹Maain wi ham Herodias hanhan wemirir Herot mitik kire hirak kaknep Jon. Wi im Herot han kitet wi nipaa miye pirak winaak, te hirak kemani menmen kakwet mit nirak ne gavman netike mit kerek naanmipre mit ne ami netike mit niuk mir iuwe neit provins Galili hirak kakwetir menmen hir nanim. ²²Hir naam epei au, Herodias niki pire wan wirire winor henye. Hir mit han yaaik iuwe neriuwep, te Herot ketpiwe kar ik: “Ti itauhi me menmen ti hanhanem, te hi tewen ewetitem. ²³”Menmen mekam ti itauhiyem hi ewetitem. Ti itauhi me menmen hi naanmiprewem te hi enke pinam ewetitem hi wen hetenen pinam.”

²⁴Hirak katip epei au, hire wen witeik witehi miye pire war ik: “Hi ehitiwekhi mekam?” Hire miye wetpiwe war ik: “Ti ehitiwekhi me mitik

^w 6:13 Je 5:14 ^x 6:14 Mt 16:14; Mk 8:28 ^y 6:18 Lev 18:16 ^z 6:18 Lev 18:16 ^a 6:23 Est 5:3, 6, 7:2

kakno kaknep mitik Jon Baptais kerek kikir mit neriuwe tipar hirak kakweto paan kirak.”²⁵ Hire pike wan waswas wetpiwek him iuwe war ik: “In ek ti eweto paan ke Jon ekikre tikenup.”²⁶ Herot kemtau him im, hirak han enuk. Te nipaa hirak ketpiwe him iuwe, mit yapirwe nemtewek. Te hirak kinapen kaknep Jon, te hirak yink enuk katip mite auye.²⁷ Te hirak kesiuwe mitik ken kerekir Jon teruk kirak kekre winak enuk.²⁸ Hirak kewis paan kirak kekre tikenup hirak pike keiyik kan kewet mite rek. Hire wen witeik wewet miye pire paan ke Jon.

²⁹Maain mit ne Jon nertei hirak epei kaa, hir nen winak enuk neit yink kirak neiyik nan newisik kekre hei.

Jisas kewet mit nar 5,000 menmen hir naam

(Mt 14:13-21; Lu 9:10-17; Jo 6:1-13)

³⁰^bMit aposel ne Jisas pike nan netpiwek menmen hir niriakem natip mit miyapir em.³¹ ^cHirak ketpor kar ik: “Yi eitikewa haiu mamno wit weinik mamu mamit ein.” Hirak katip kar ik kentar mit yapirwe nan netpor wanewik ere witaan, te hir ap nau naam menmen taau.³² Hir hiras nau bot nepno wit weinik.

³³Te mit yapirwe ne wit yapirwe niri hir nen, hir nerteiri hir neimin, te hir mit miyapir nesiuknen ninin nen wit weinik eik ek nemeriyor hir naninen.³⁴ ^dJisas kenke kinaaiwir bot ken kiun tenhaan kerp ti eik, hirak kir mit yapirwe nererik in, hirak hanhani kentar hir nire sipsip mit naanmiprewem au, hiram mamno heriyai heriyai menmen mamimip mamiwaankem. Hirak katip keteiknor menmen me God yapirwe.

³⁵^eMaain menep kakre witaan hirak wen ketpor him, mit disaipel nirak nan netpiwek nar ik: “Wit weinik ik ek, nepei au kakre witaan.³⁶ Ti eriuweti enino enrer wit wit enit menmen enim.”³⁷ Hirak Jisas ketpor, “Yi hiras eiwetir menmen hir nanim.” Te hir pike netpiwek, “Haiu emno emwir pewek mar 200 kina mamit menmen a? Taauye! Haiu ap meit pewek mei yapirwe au!”³⁸ Jisas kitorhi kar ik: “Menmen marmenum mepeit in? Yi eino eiwenhisem.” Hir epei nen newenhisem, hir pike nan netpiwek nar ik: “Bret hispinak (5) metike saauk wik me wan mepeit in keremem.”

³⁹Hirak epei kertei, hirak katip mit disaipel nirak: “Yi eitip mit hir eninke hasini enu yenkis eim.”⁴⁰ Hirak ketpor kar ek, te hir nenkeri hasini hasini nau nitet yenkis, mit han nar 100, mit han nar 50.⁴¹ Te hirak ketenen bret metike saauk mau his mirak, hirak kikiamnaan men nepni eim kitehi God katip hirak yaaik. Epei au, hirak kewep bret kewet mit disaipel nirak em. Te hir netiwem neiyim nen newet mit miyapir em. Epei au, hirak pike keit saauk kewetirem hir neiyim nen newet mit

^b 6:30 Lu 10:17 ^c 6:31 Mk 3:20 ^d 6:34 Mt 9:36 ^e 6:35 Mk 8:1-9

miyapir em hir naam. ⁴²⁻⁴³Mit miyapir yapirw naam ere tu iuwe, ham au mepeit. Te mit disaipel neit menmen yinam miwaai em kerek mit hir naam au, hir nemi mekre wapnake mar hiswiyen wik (12) ere mau him. ⁴⁴Hir mit yapirwe nar 5,000 mit keriyen hir nererik naam menmen.

Jisas ken kitet tipar keke niu

(Mt 14:22-23; Jo 6:15-21)

⁴⁵In ek Jisas katip mit disaipel nirak him manp te hir eninin enu bot enino enrekir wan eniun pinak ein enmeriyiwek enit wit Betsaida. Hirak kakriuwet mit hir nanino heriyai heriyai nanrer wit mir eim. ⁴⁶Hirak Jisas keriuweti hir nen, te hirak ken miniu (o neiyip) kitehi God, hirakit tewepnak. ⁴⁷Maain witaan man, bot ke mit wen kerekir wan ke nimin, hirak Jisas kerp ti kepu weinik. Hirak kir mit nirak hir neiyik newen tipar iuwe neriuwet bot ken, te nime miniu meriuwet bot ap ken kiun pinak ein au. ⁴⁸Menep wanewik, Jisas hirak kitet wan keke niu ken. Hirak kakno kaksipaap mit nau bot, ⁴⁹te hir nirek kitet wan keke niu ken, hir han kitet hirak herwe. ⁵⁰Te hir ninaain nenepip. Hir nenepip te hirak ketpor kar ik: “Yi han tokik eiyu. Hi Jisas kerekek hi han. Te yi ap eineina au.” ⁵¹Hirak ketpor epei au, hirak kehin kiniu ketikeri nau bot. Te nime matin meit. Hir nirek, te hir nepirpir iuwe. ⁵²Hir ap han kitet menmen me bret kerek hirak kiriakem kewet mit em hiram meteiknor hirak Mitik Iuwe. Au, han kir wen toenuk. Mar im te hir nepirpir.

Jisas kikaap mit miyapir hir ninap neit Genesaret

(Mt 14:34-36)

⁵³⁻⁵⁴Hir nerekir wan ere hir niun tenhaan ken pin eik. Hir ninaaiwir bot nerp tenhaan mit yapirwe hir nir ninaan me Jisas hir nerteiyek hirak keimin. Te hir nen heriyai heriyai ⁵⁵nerer wit wit hir nenerir mit ninap neri nen newisi niwaai nentar yeno, hir ninani neri nen wit kerek hir nemtau Jisas kewiyen. ⁵⁶Jisas ken kerer wit kike o wit iuwe, hir mit newis mit ninap hir nau yaain menep yayiwe, hir nitiwekhi te hir newir his netenen klos mirak. Mit kerek newir his netenen klos mirak, hir pike nire yaaik.

Jisas kene mit kerek hir nises him me maamrer,

ap nises him me God au

(Mt 15:1-9)

7 ¹Mit han ne Farisi kerek ninin nises him me Moses, hir netike mit han kerek ninin nertei him me Moses natip mit miyapir em, hir ninaaiwir wit Jerusalem nen nererik neit wit eik nanir Jisas. ²Hir nir mit

^f 6:46 Mk 1:35; Lu 5:16, 6:12, 9:28 ^g 6:49 Lu 24:37 ^h 6:51 Mk 4:39 ⁱ 6:52 Mk 8:17
^j 7:2 Lu 11:38

disaipel han kerek nises him me Jisas hir nipaam menmen te hir ninin nekemyet his mir au. ³(Mit miyapir ne Isrel hir niutip niutip nises him me maamrer te mit ne Farisi hir nisesim iuwe. Hir nekemyet his au, te hir nanim menmen au. ⁴Hir nanino wit nanit menmen mit nesiwerem meit maket, hir nantiwem pike naninen wit eik hir ninin nanmir au, te hir nanim menmen au. Hir nises him meiyam me maamrer mar im. Hir nekemyet wa hesnu, min me toni, wenkepye, sar metike min me ain. Au, hir ap te nanim menmen taau!)

⁵Hir mit ne Farisi netike mit kerek ninin nertei him me Moses natip mit miyapir em, hir nitehi Jisas nar ik: “Nenmak mit hir nises him mit, te hir ap nises him me maamrer? Hir naam menmen neriuwe his enum hapik mewim.” ⁶Jisas ketpor kar ik: “Nipaa Aisaia hirak katip him me yi mit kerek yewenin him. Hirak kewis him mau tiwei mar im:

‘Mit in newenanipi neriuwe him mir, te han kir kisisa au.

⁷Hir nitehir newen ninip nine henye newenipi niuk mai weinim.

Hir natip mit miyapir him mir hiram mar ke him me God.’ ⁸“Yi yeweikin sip yewet him me God, te yi yises him weinim mit keriyen hir netpiyem.”

⁹Hirak wen ketpor, “Yi yertei werek werek eiweikin sip eiwet him me God te yi eiyses him mi. ¹⁰”Nipaa Moses kewis him mau tiwei katip kar ik: ‘Yi naanmampre miye haai ni eiwenipi niuk mir eikepi, maain yi naanmampri. Neimin hir nene miye haai nir nanre newirpaan newepik, hir mit han naninip nani nanit.’ ¹¹Te yi mit yatip mitik hak kaktip miye haai nirak menmen hirak maain kakwetirem kakikepi, te hirak kehimitanem kakwet God em, ¹²te maain yi yeriwesisek hirak ap kakwet miye haai em kakikepi kakriwerem au. ¹³Mar im yi yewenin him me God yeriuwe menmen maamrer netpiyem yi yisesim yatip mit em. Yi mit yiriak menmen yapirwe enum mar im.”

Menmen mit niriakem menip God hirak katip hir enun

(Mt 15:10-20)

¹⁴Jisas pike kenine mit miyapir yapirwe hirak ketpor kar ik: “Yi mit miyapir yapirwe, yi nikip emnep eiyimtau him mai, yi han ekitetim! ¹⁵”Menmen mit nanim mamno tu kir hiram ap menip God kaktip mit hir enun au. Menmen mekre han ke mit hiram meweikin han kir hiram menip God hirak kaktip mit hir enun. ¹⁶Neimin hir enirtei hir nanimtwewem.”

¹⁷Maain hirak epei kinaaiwir mit hirak ken winak ken nimin ein, mit nirak nises him mirak hir nitiwekhi me him nipa hirak ketipim.

¹⁸Hirak kenemyor naan ketpor kar ik: “Yi wen yepitariyem yar ke mit ein a? Yi yepitari menmen hiram mamno him ke mit hiram menip God

^k 7:4 Mt 23:25 ^l 7:6 Ais 29:13 ^m 7:10 Eks 20:12, 21:17; Diu 5:16 ⁿ 7:15 Ap 10:14-15

hirak kaktip mit hir enun taauye! ¹⁹Menmen hiram mamno mamike tu kerekek maain mit hir nanino naninerem mamno mune ne heim.” (Me him im Jisas katip hirak keteiknai menmen yapirwe me ti hiram yaaim te haiu mamim.) ²⁰Hirak wen katip, “Menmen enum mekre han ke mit hiram menip God kaktip hir enun. ²¹Menmen mekre han ke mit meit nimin hiram menipi hir han kitet enum, hir nisesan niriran, hir nekintip menmen o hir nenep mit nani. ²²Hir nari miyapir ne mit han his newenem niwaaai netikeri, hir hemkre menepam enum nanit menmen, hir niriak menmen enum meit wit wit heriyai heriyai, hir newenin him, hir nenke perke enum o paan tokik nekitet naan, hir han enuk neriuwe mit hir ninini neit menmen yapirwe, hir netpi nisesi, hir han kitet hir iuwe ninin mit han. Menmen im metike menmen ham enum. ²³Menmen im yapirwe meit nimin mekre han man hiram menip God hirak kaktip mit hir enun.”

Mite pe Finisia witehi Jisas hirak kakepiye
(Mt 15:21-28)

²⁴Maain Jisas hirak kekrit kinaaiwir wit ik, hirak kepno ken hin me wit Taia. Hirak ken kiun ein, hirak ken kepu winak hak kinapen hir mit en nertei hirak kepu winak eik, te hir nemtewek. ²⁵In ek, mite hap niki pire herwe enuk kersisep, hire wemtau mit natipan me Jisas. Te hire wen wenke wiwaaai ti menep hit me Jisas. ²⁶Mite ip hire pe Isrel au. Hire miye pire wina (o winiye) weit provins Sairo Finisia. Hire witehi Jisas hirak kakipir herwe kaknopin kakikeipin niki pire.

²⁷Te Jisas katip hirak kakinin kakikaap mit ne Isrel, te hirak ketpiwe tok piksa kar ik: “Nikerek hir eninin enim menmen. Hiram enum te haiu mit mamkin menmen me nikerek mamwirem mamno mamwet nepere rem.”

²⁸Te hire wetpiwek, “Ti atip werek Mitik Iuwe, te nepere mekorir menmen me nikerek minatin miwaaai ti.”

²⁹Hirak ketpiwe, “Ti atip werek ik, te ti pike eno witeik. Hirak herwe epei kenke kenpin kinaaiwir niki pit.” ³⁰Hire pike wen witeik, hire wir niki pire wiwaaai yeno, hire wertei herwe epei kenke kenpin kekeipniwe.

Jisas kikaap mitik enuk ap katip au, nikip toto

³¹Maain Jisas kinaaiwir wit ke Taia keit ein, hirak ken kewep nimin ke wit Saidon hirak ken menep hin me wit hiswiyen (10) hirak ken ere kiun wan ke provins Galili. ³²Mit han neit mitik hak neiyik nen neteikin Jisas ek. Mitik ik hirak nikip toenum katip werek au. Teruk enuk kemerhin (o kemarkik). Hir natip Jisas him iuwe, te hirak kakwis

° 7:21 Ga 5:19-21 P 7:31 Mt 15:29-31 ¶ 7:32 Mk 5:23; Lu 4:40, 13:13

his maminterik kakikepik. ³³Hirak Jisas ketiwekhis keriyaak keiyik ken ketikerek tekiyakit tinaaiwir mit yapirwe nererik neit ein. Te hirak kewis histuwak mirak mekre nikip mirak, hirak kenikin timank men nin kirak. ³⁴Te hirak kikiam naan men niu kekin han ketpiwek kar ik: “Efata.” Haiu meweikin him haiu matip, “Ti nikip mit emnep emtau menmen.”

³⁵Hirak nikip mirak menep, teruk kerek kemerhin (o kemarkik) epei au, hirak katip werek werek. ³⁶Hirak Jisas ketpor him iuwe te hir enwepyapir menmen im emit! Hirak kehimitenorem katip hir ap enitpim au emit! Te hir newepyapirem iuwe nerer wit wit heriyai heryiyai. ³⁷Umit in han kekrit wisenum hir natip nar ik: “Hirak epei kiriak menmen yapirwe yaaim. Hirak wen kiriak mitik ik nipaa nikip to enum, hirak nikip menep kemtau him.”

Jisas kewet mit nar 4,000 menmen hir naam

(Mt 15:32-39)

8 ¹In ek mit yapirwe nererik nan, hir ap neit menmen mei te nanim au. Te Jisas hirak kenine mit disaipel nirak ketpor kar ik: ²“Hi hanhan heriuwe mit in. Hir nau netikewa me wi wikak, te in ek menmen hiram epei au mesi hir ninpi maan. ³Hi eriuweti nanit ninpi nanino nir ein te hir ninpi mamin naninkewin nanwaai yayiwe. Mit han hir neke yanimin nan.” ⁴Mit nirak netpiwek nar ik: “Haiu mamwetir menmen hir nanim mamirkeik? Wit ik ek hirak weinik.” ⁵Jisas hirak kitorhi kar ik: “Menmen marmenum mepeit?” Hir natip, “Menmen hispinak wik(7).”

⁶Hirak katip him iuwe te mit miyapir yapirwe hir nanu ti. Te hirak ketenen bret hispinak wik (7), hirak kitehi God em katip hirak yaaik. Te hirak kewenin bret kewet mit disaipel nirak em hir nenkerem newet mit yapirwe rem. ⁷Hir mit disaipel nirak wen netenen saauk ham kike. Te Jisas kitehi God em, hirak kewet mit nirak em ketpor hir enwet mit han em. Hir newetirem. ⁸Hir mit yapirwe naam menmen ere tu iuwe. Mit disaipel nirak nen neit menmen yinam wen mepeit, hir neiyim nen nemi mekre wapnake hispinak wik (7) mau him. ⁹Mit miyapir nar 4,000 hir epei naam menmen im. Hir epei naam, hirak keriuweti nen. ¹⁰Hirak keriuweti nen, hirak ketike mit disaipel nirak hir nehin ninu nau bot, hirak kerekir wan ken kiun hin me distrik Dalmanuta.

Mit Farisi nitehi Jisas hirak kakriak menmen hir nanirem

(Mt 16:1-4; Lu 12:54-56)

¹¹In ek mit han ne Farisi kerek hir ninin nises him me Moses hir nan netike Jisas newepnak. Hir nenerek nitiwekhi hirak kakriak menmen

† 7:33 Mk 8:33 ‡ 7:34 Mk 6:41; Jo 11:41 § 7:36 Mk 1:43-45 ¶ 7:37 Ais 35:5 ∑ 8:2 Mk 6:34-44 * 8:11 Mt 12:38

kakteiknor hirak God keriuwetek kan ti ik. Hir hanhan nanri han kirak. ¹² *Jisas kekin han ketpor kar ik: “Yenmak yi mit yitauhi te hi ariak menmen hi eteikni God keriuweta hi han a? Hi hetpi werek. Hi ap te eteikni yi mit ne ti menmen mar im taau.” ¹³ Hirak katip epei au, hirak kinaiwiri kehini kinu kau bot ketike mit nirak, hirak kerekir wan kakno pinak ein.

Tok piksa me him me mit ne Farisi netike him me mitik iuwe King Herot
(Mt 16:5-12)

¹⁴ Hir mit disaipel nirak neit bret au, hir han kaa rem. Kiutip kiwaai kekere bot kepeit kerekek. ¹⁵ Bot hirak wen kerekir wan, hirak Jisas katip him iuwe ke him enum mit newepyapirem natip hiram yaaim metike menmen mit ne mitik iuwe King Herot niriakem. Hirak ketpor, “Nanempre hiras. Yi einopin eikeipin yis me mit ne Farisi metike yis me mit ne Herot.” ¹⁶ Te hir natipan nar ik: “Haiu han kaa bret te hirak kenai ketpaiyem.” ¹⁷ *Jisas kemtau hir natipan, te hirak ketpor kar ik: “Yenmak te yi yatip yi han kaa bret a? Yi ap han kitet menmen werek werek wen au a? Han ki au to enuk a?”

¹⁸ ^a “Yi nanamir kewi te yi yir menmen au. Yi nikip mewi, te yi yemtau menmen au. Yi han kaa menmen im a? ¹⁹ ^b Nipaa ein hi eweprep bret mar hispinak (5) me mit nar 5,000, yi yeit yinam mekre wapnake mau him marmenum a?” Hir netpiwek, “Haiu memi mar hiswiyen wik (12).” ²⁰ Hirak ketpor kar ik: “Me bret hispinak wik (7) me mit nar 4,000 yi yeit yinam yemi mekre wapnake mau him marmenum a?” Hir netpiwek, “Haiu meit hispinak wik (7).” ²¹ Hirak ketpor, “Yi wen yepitari a? Hi ap heni me bret au. Hi hetpi yi einopin ap eiyises him enum mit ne Farisi natip mit hir enisesim.”

Jisas kikaap mitik ke Betsaida hirak nanamir toto

²² Maain hir nen niun wit Betsaida. Hir mit han nari mitik nanamir toto hir neiyik nan nir Jisas, hir nitiwekhi him iuwe te hirak kakwis his maminterik. ²³ ^d Jisas keteninwek his kariyaak ken kinaaiwir wit ken kerp pin eik. Hirak kenikin timank men nanamir kirak, hirak kewis his menterik. Te hirak kitiwekhi kar ik: “Ti hir menmen o au?” ²⁴ Hirak mitik kiwaainan kir ein ein katip, “Hi hir mit neke ti o hi hir nu waai?” ²⁵ Hirak Jisas pike kewis his mentar nanamir kirak. In ek hirak mitik kir himin naan menmen hirak kirem werek werek yaaim. ²⁶ ^e Hirak nanamir yaaik te Jisas kare kaksuwerek kakno, hirak ketpiwek kar ik: “Ti ap eno wit Betsaida eik, au emit! Ti eno nit en kerekek.”

* 8:12 Lu 11:29 y 8:15 Lu 12:1 z 8:17 Mk 6:52 a 8:18 Jer 5:21; Esi 12:2; Mk 4:12; Ap 28:26 b 8:19 Mk 6:41-44 c 8:20 Mk 8:6-9 d 8:23 Jo 9:6 e 8:26 Mk 7:36

Pita kewepyapir Jisas hirak mitik Kraiss God kesiuwerek kan ti
(Mt 16:13-20; Lu 9:18-21)

²⁷Maain Jisas ketike mit disaipel nirak nen nerer wit wit me Sisaria Filipai. Hir wen nepno hirak kitehi mit nirak kar ik: “Mit hir nenewa hi keimin?” ²⁸^fMit nirak hir netpiwek nar ik: “Mit han natip ti Jon kerek kikir mit nekre tipar ti pike hekrit heke herwe hei han. Mit han natip ti profet Ilaija ti hinaaiwir wit ke God hekiuwe han ti ik e. Mit han natip ti mitik profet hak nipaa natip him me God newepyapirem natip mit em, ti pike hekrit heke herwe hei han.” ²⁹^gHirak Jisas kitorhi, “Te yi han kitet hi keimin?” Hirak Pita ketpiwek, “Ti Mitik Kraiss kerek God kehimitanit kerek ti ekepai haiu mit keriyen.” ³⁰^hJisas ketpor him iuwe, “Yi ap eiwepyapir hi keimin au emit!”

Jisas katip maain hirak kaki hirak pike kakikrit
(Mt 16:21-28; Lu 9:22-27)

³¹In ek, hirak kinin ketpor kar ik: “Maain hi Mitik ke wit ke Mitik luwe hi yink kai kakiyewo iuwe. Haairer netike mit iuwe pris kerek newet God menmen me mit, hir netike mit ninin nertei him lo me Moses, hir nanineina te hir naniyep hi hahi. Te maain wi wikak, hi pike ekrit ehu.” ³²Jisas katip him kepakin menmen au, hirak kewepyapirem. Te Pita ketpiwek keriyaak keyiink ken pin eik hirak kenerek ketpiwek kar ik: “Ti han kitet menmen mar im au emit.” ³³Jisas keweikin kir mit disaipel nirak han te hirak kene Pita ketpiwek kar ik: “Seten ti enopin ekeipno. Ti ap han kitet menmen har ke God han kitetim au. Ti han kitet menmen har ke mit keriyen.”

³⁴ⁱMaain Jisas kenine mit yapirwe netike mit disaipel nirak. Hir nan nererik nau, te hirak ketpor kar ik: “Neimin hir hanhan nanisisa nanimtau him mai, hir hanhan hiras au. Hir ap nehinhin eninaain menmen enum mamnen mamriwaank nentar hir nises him mai. ³⁵^jNeimin niriak ek au, te hir nare nanu nanit menmen yapirwe, maain hir maain nani. Te neimin nani nanintar him mai hir nisesim, hir nantikewa nanu nanit. ³⁶Mitik hak keit menmen yapirwe me ti te himin kirak hirak kakiwaank, mamirkeik te hiram mamkepih hirak kaktike God tatu werek a? Taauye! ³⁷Mitik kakwet God mekam te hirak kakwetiwewek himin hak yaaik kirak a? Taauye! ³⁸^kNeimin ne yi mit yi yink enuk ap eitip mit enun ne ti ik yi yises him mai, maain me wi hi Mitik ke wit ke Mitik luwe hi heit menmen me Haai merhihe mewepna, hi anen ehrip ti hetike mit ensel nai, hi eweikin sip ewet yi mit.”

^f 8:28 Mk 6:15 ^g 8:29 Jo 6:68-69 ^h 8:30 Mk 9:9 ⁱ 8:34 Mt 10:38-39 ^j 8:35 Lu 17:33; Jo 12:25 ^k 8:38 Mt 10:33

9 ¹Jisas ketpor kar ik: “Hi etpi werék. Mit han nepu nepeit in hir nani wen au, te hir nanir menmen iuwe God kiriakem mamnen hirak heiyim naanmampre mit kakriuwere.”

Mit disaipel nir yink ke Jisas hirak keweikin kire menmen ham
(Mt 17:1-13; Lu 9:28-36)

²Maain wi hispinak kiutip (6) epei men, hirak Jisas keithis Pita, Jems, Jon tetikerek ten miniu (o neiyip) kau niu ein. Hirakit tepu weinim. Mit han au. Hirakit tirek keweikin his keit in. ³Laplap mirak merhihe mire hike, te hir mit ne ti hir ap te niriakem mar im taauye. ⁴Hirakit tir Ilaija ketike Moses, hirakit maam nipu te nipaa ein, hirakit wik tetike Jisas tewepnak. ⁵Hirak Pita kir menmen im te hirak katip Jisas kar ik: “Haai, haiu mau in hiram yaaim. Haiu mamwep weisak wikak. Kiutip kit, kiutip ke Moses, kiutip ke Ilaija.” ⁶Hirak Pita katip him im kentar hirakit tinaain te Pita kepitari him mekak hirak ketpiyem, te hirak ketpi him im o him eim. ⁷Hirak katip epei au, napi kiwapini, hirakit temtau him me God meke napi man matip mar im: “Hirak Nikan kai ik hi hanhanek. Nikip emnep yi eiyimtau him mirak.” ⁸Hiram matip epei au, napi kewep ken hirakit terenaan waswas tir mitikit wik au. Hirakit tenep teit pike ten wit ke God. Jisas kerekek hirak kepu.

⁹Hirakit tekiuwe miniu (o neiyip) Jisas kewenet ketpiwekit hirakit ap tewepyapir menmen hirakit epei tirem au emit ere maain hirak Mitik ke wit ke Mitik Iuwe hirak kaki pike kakikrit kaku. ¹⁰Hirakit temtau him mirak hirakit tepakinek. Te hirakit titehiyakit menmen Jisas ketpiwekitem me maain hirak kaki pike kakikrit kaku. ¹¹Te hirakit titiwekhi tatip tar ik: “Nenmak mit ninin nertei him lo me Moses hir natip Ilaija kakinin kaknen, te maain Mitik Krai kikaru kaknen?” ¹²Jisas ketpiwekit, “Hirak Ilaija kakinin kaknen pike kakriak menmen ere werék. Te nenmak hir mit ne nipaa ein newis him mau tiwei me hi Mitik ke wit ke Mitik Iuwe hi yink kakiyewo iuwe, mit hir nanitetaunaan a? ¹³Te hi hetpi werék. Hirak Ilaija epei kan, te mit hir nerekiyiwék nises han kir mar ke nipaa mit newisim mau tiwei. Hirak Jon kerekek.”

Jisas kikaap nikan hirak kepir herwe enuk kenpin kekeipniwek
(Mt 17:14-21; Lu 9:37-43)

¹⁴Hirak ketpiwekit epei au, hirakit tan tir mit disaipel nirak han. Hirakit tir mit yapirwe nan nererik neweiknor. Mit disaipel hir netike mit hir ninin nertei him lo me Moses hir nenehan me menmen. ¹⁵In ek hir mit nir Jisas kan te hir han kekrit han yaaik nen natip nar ik: “Ti epei han.” ¹⁶Hirak ketpor, “O hi epei han.” Te hirak kitorhi, “Yi yenehan yektaan mekam?” ¹⁷Mitik kiutip ke hir yapirwe hirak ketpiwek kar ik: “Haai, hi epei hari nikan kai heiyik han. Hirak herwe enuk kersisek kewek teruk. ¹⁸Me wi hirak kersisek, hirak

¹ 9:1 Mk 13:30 ^m 9:7 Mt 3:17; 2Pi 1:17-18; Diu 18:15; Ap 3:22 ⁿ 9:9 Mt 12:16; Mk 8:30
^o 9:12 Mal 4:5; Sam 22:1-18; Ais 53:3 ^p 9:13 Mt 11:14

kewirek kiwaai ti, hirak nikan kenikin mar tiwerpek, hirak kenip yehes mirak kikir kikir, yink kererwo. Hi hitehi mit disaipel nit hir nanipir herwe kakno, te hir taauye!”

¹⁹Jisas hirak kemtau him im te hirak keneri kar ik: “Yi mit miyapir kerek yi ap han ekitita? Wi marmenum hi ehu emeryi te yi han ekitita? Ehit nikan eiyik enen.” ²⁰Hir neiyik nan hirak herwe enuk kir Jisas. Herwe enuk kir Jisas, hirak han enuk kersis nikan kenipek kenke kiwaai ti. Nikan keweikin heriyai heriyai, hirak kenikin mar tiwerpek.

²¹Jisas kitehi haai kirak kar ik: “Wi marmenum hirak kirak kar ik e?” Haai kirak ketpiwek, “Nipaa hirak nikan kike ere in. ²²Hekrit hekrit hirak herwe kersisek te hirak kewirek kekere si o kekere wan tipar te hirak kaknep hirekes kaki. Ti iuwe ti hertei epi herwe eik, te ti hanhanai ekepik.” ²³Jisas hirak kenerek kar ik: “Ti henmak ti atip te hi hertei a? Keiyin han kitita hirak kakriak menmen yapirwe.” ²⁴Waswas haai kitehi Jisas him iuwe, “Hi han kitetit iuwe au, kike keremem. Ti ekepa te hi han ekitetit iuwe.” ²⁵Jisas kir mit yapirwe nesiuknen nan nererik neweikniwek nanirek, hirak kene herwe enuk ketpiwek kar ik: “Ti herwe enuk hersisek hewek teruk hemesisiwek nikip paan toto, hi hetput him iuwe ti etpaan eno ekeipniwek ap pike eno ekrerek au ekit. Ti enopin.” ²⁶Hirak herwe kekere nikan hirak kenepip pike kenep nikan, hirak kaa keperper, hirak herwe kenpin kekeipniwek ken. Hirak nikan kiwaai kire mitik epei kaa, te mit yapirwe natip, “Hirak epei au kaa.” ²⁷Te Jisas keriyiwek his men niu kari nikan hirak kekrit.

²⁸Maain hirak ken winak nimin ein, hir mit disaipel nirak nitiwekhi nar ik: “Menmak te haiu ap mepirek ken au a?” ²⁹Jisas hirak ketpor, “Yi yepir herwe enuk kar ik yeriuwe menmen ham au. Prea keremem.”

Jisas katip keteipim hirak kaki, maain hirak pike kakikrit

(Mt 17:22-23; Lu 9:43-45)

³⁰Maain hir ninaaiwir wit ik, hir nen nitet yayiwe neke nimin ke provins Galili, te hirak kinapen mit yapirwe hir nanirteiyek. ³¹Hirak kinapen kentar hirak hanhan katip mit disaipel nirak him mirak. Hirak ketpor kar ik: “Hi Mitik ke wit ke Mitik iuwe mit han hir nanriuweta hi eno his me mit enun hir naniyep hi hahi. Maain, wi wikak, hi pike ahikrit hahu.” ³²Hir han kitet him mirak hir nepitariyem. Te hir ninaain nanitiwekhi me menmen hirak ketporem.

Keimin hirak kire mitik iuwe

(Mt 18:1-5; Lu 9:46-48)

³³Hir newepnak epei au, hir nen niun wit Kapaneam. Hir epei nen winak nimin ein, hirak kitorhi kar ik: “Nipaa haiu wen mipitet yayiwe,

^q 9:23 Mt 21:21; Mk 11:23 ^r 9:24 Lu 17:5 ^s 9:26 Mk 1:26 ^t 9:30 Jo 7:1 ^u 9:31 Mk 8:31, 10:32-34 ^v 9:32 Lu 18:34

yi yatipan mekam?” ³⁴ ^wHir au nekintip nentar nipaa hir natipan me hir hiras keimin ke hir hirak kinini iuwe. ³⁵ ^xJisas kau yeno kari mit hiswiyen wik nirak (12), hirak ketpor kar ik: “Mitik hak kakinin mit han, hirak ekikaru ekikriak menmen mir weinim.” ³⁶ Hirak kari nikan kewisik kerp keit nimin. Hirak keiyewewik ketpor, ³⁷ ^y“Mit neimin kerek hir nikaap mitik kiutip kar ke nikan ik nentar hir nises him mai, hirak kar ke hir nikaap mitik kerekek au. Hir nekepi ketikewa. Mit kerek nekepa, hir nekepa kerekek au. Hirak kar ke hir nekepa hetike Mitik Iuwe kerek keriuweta hi han ti ik.”

Neimin hir niriak menmen mar ke haiu miriakem, hir naiu yinan
(Lu 9:49-50)

³⁸ ^zHirak Jon ketpiwek kar ik: “Mitik Iuwe, haiu mir mitik hak kepir herwe enum kekine niuk mit, te haiu meriuwesisek kentar hirak kises him mit ketikewai au. Haiu mit keriyen.” ³⁹ ^aJisas ketpor kar ik: “Yi yeriuwesisek au ekit! Mitik kerek kiriak menmen yaaim iuwe kekine niuk mai, hirak ap te kaktip enum me hi waswas taau. ⁴⁰ ^bNeimin hir niriak menmen mar ke haiu miriakem, hir naiu yinan. ⁴¹ ^cHi hetpi werek. Mit han nekepi, hir neweti tipar mei yi yayim yentar yi yises him me hi Kraiss, God hirak ap han kaa menmen im au. Maain hirak kakwetir menmen yaaim.

Menmen enum mitik hak kiriakem mamiwaank him mitik hak kisesim
(Mt 18:6-9; Lu 17:1-2)

⁴² “Mitik hak kakriak nikan hak ke nikerek yapirwe in hir han kitita kar ik, te hirak keweikin han kirak te hirak kakriak enum, hirak yaaik te mit han hir nankaaip nan kariyiwek teruk hir nanwirek kakno kakikre wan kaki te maain hirak ap kakriak menmen ham enum te God han enuk wisenuk kakiwaankek kakikre si. ⁴³ ^dTi hiriak menmen enum heriuwe his mit te ti eremir meiyam pinam ewirem. Ti eremir meiyam pinam ewirem hiram enum kike mentar ti ap eriak menmen enum ti etike God yi eiyu eiyit tipmain tipmain enum eik. Te ti his mit wik mepwit ti eriak menmen enum ere ti eno si tatiknenit te ti ehu en tipmain tipmain enum eik, hiram menmen enum iuwe. ⁴⁴ [Ti eno wit enuk ik, henek hiram mamik yink ki hirak kaki au, si mami au mamu tipmain tipmain enum eik.] ⁴⁵ Ti hiriak menmen enum heriuwe hit mit, te ti eremir meiyam pinam ewirem. Ti hit miutip keremem mepwit hirak enum kike. Ti etike God yi eiyu eiyit tipmain tipmain enum eik. Te ti hit mit wik mepwit ti eriak menmen enum ere ti eno si tatiknenit ti ehu tipmain tipmain enum

^w 9:34 Lu 22:24 ^x 9:35 Mt 20:25-27; Mk 10:43-44 ^y 9:37 Mt 10:40 ^z 9:38 Nam 11:27-29 ^a 9:39 1Ko 12:3 ^b 9:40 Mt 12:30; Lu 11:23 ^c 9:41 Mt 10:42 ^d 9:43 Mt 5:30

eik, hiram enum wisenum. ⁴⁶[Ti eno wit enuk ik, henek hiram mamik yink ki hirak kaki au, si mami au mamu tipmain tipmain enum eik.] ^{47e}Ti hiriak menmen enum heriuwe nanamir kit, te ti eket keiyak ewirek. Ti nanamir keiyak kiutip kepwit hirak enuk kike. Ti hetike God yi eiyu eiyit tipmain tipmain enum eik. Te ti nanamir wik kepwit te ti hiriak menmen enum ere ti eno si tatiknenit ti ehu tipmain tipmain enum eik, hiram enum iuwe. ^{48f}Ti eno wit enuk ik, 'henek hiram mamik yink ki hirak kaki au kaku, si mami au mamu tipmain tipmain enum eik.' ⁴⁹Sol (o siyak) mamno mamikre menmen mamnipem hiram yaaim mamtin him. Mar im menmen enum kerek mewaank mit, hiram mamkepi yi yayir ke mit yaain. ^{50g}Sol hiram menmen yaaim. Hiram merekir nin au, hiram enum mire tipar harik, te yi yarkeik eiriakem te hiram pike mamrekir nin a? Taauye! Yi yire sol (o siyak) yi han kitet menmen yaaim te yi eitike mit han yi eikiyan eiyu eiyit."

Jisas katip him me mit hir nepir miyapir nir

(Mt 19:1-12; Lu 16:18)

10 ¹Maain Jisas kinaaiwir wit Kapaneam hirak ken kiun hin me provins Judia. Te hirak ken kerekir mani Jordan ken pinak kerek wepni kekai kan. Hir mit yapirwe ne wit yapirwe pike nan nererik nanirek. Hirak pike ketpor kar kerek nipaa ein hirak kiriakem. ²Hir mit han ne Farisi kerek ninin nises him me Moses, hir nan niun Jisas newisesik, hir nitiwekhi nar ik: "Him lo me maamrer hiram mewis mitik hak kepri mite pirak hire wauno waunaiwirek o au?" ³Jisas hirak kinin kitorhi him ham kar ik: "Him me Moses hiram matip mekam?" ^{4h}Hir natip, "Him me Moses mewis mitik hirak kewis tiwei kakwet mite pirak ek, te hirak kampirep wauno." ⁵ⁱJisas ketpor kar ik: "Hirak Moses kewis him im mentar yi mit enun han to enuk. ⁶Nipaa enum eik God kiriak ti ketike menmen yapirwe, hirak kewis mitik ketike mite pirak. ^{7j}Mar ik te mitik hak kaknaiwir miye haai nirak, hirak kaktike mite nanu nanit, ⁸hir nankiyan nanu nanir ke yink kiutip. Hir wik au, hir nire niutip. ⁹Te mitik mite God kerekyor hir neitan, hir mit han ap te nanriuwetep wauno waunaiwirek taau."

¹⁰Maain hir mit nirak netikerek nau winak neit niman ein, hir nitiwekhi me menmen im. ^{11k}Te Jisas ketpor kar ik: "Mitik hak kepri mite pirak kakit mite hap, hirak kiriak enum me mite winin nipaa hirak ketiwe. ¹²Mar keremem, mite piutip waunaaiwir mitik kire wawit mitik hak, hire wiriak enum me mitik kinin nipaa hire wetiwek."

^e 9:47 Mt 5:29 ^f 9:48 Ais 66:24 ^g 9:50 Mt 5:13; Lu 14:34; Kl 4:6; Ro 12:18; 1Te 5:13

^h 10:4 Diu 24:1-4; Mt 5:31 ⁱ 10:5 Jen 1:27, 5:2 ^j 10:7 Jen 2:24; Ef 5:31 ^k 10:11 Mt 5:32; 1Ko 7:10-11

Mit neit nikerek kike neri nan nir Jisas
(Mt 19:13-15; Lu 18:15-17)

¹³Mit han neriuwet nikerek nir nanir Jisas te hirak kakwis his maminteri kakitpor him yaim. Te mit disaipel nirak hir neneri. ¹⁴Jisas kir menmen im, hirak han enuk katip mit disaipel nirak kar ik: “Yi eiwis nikerek hir naninen in. Yi ap eiweni au emit! Hir mit kerek God hirak naanmipror hir nar ke nikerek in. Hir hanhana. ¹⁵¹Hi hetpi werek. Mit kerek hir hanhan God hirak naanmampri, hir nanises him mirak nanir ke nikerek in hir nises him me miye haai nir, o au en, hir ap te nanu nantike God taau!” ¹⁶Hirak katip epei au, hirak kewis his mirak menteri hirak ketpor him mirak yaaim.

Him me mitik kerek keit menmen yapirwe
(Mt 19:16-30; Lu 18:18-30)

¹⁷Menep te Jisas kaknaaiwir wit ik kakno, mitik hak kesiuknen kan kir Jisas kewen ninip kitiwekhi kar ik: “Mitik Iuwe Yaaik. Hi ariak mekam te hi ehit himin yaaik hi etike God hawir ewu tipmain tipmain enum eik?” ¹⁸Jisas ketiwekhi kar ik: “Ti henmak te ti atip hi Mitik Iuwe yaaik a? Hirak God kiutip kerekek hirak Mitik Iuwe Yaaik. ¹⁹”Ti hertei him God ketpaiyem. “Ti ap enep mit nani au, ti ewaai etike miyapir ne mit han au. Ti ap ekintip menmen me mitik hak au. Ti ap ewises mit han ek au. Ti naanempre miye haai nit ekepi.” ²⁰Hirak katip Jisas kar ik: “Mitik Iuwe, hi hisesim, hi kike ere in.” ²¹”Jisas kipirek hirak hanhanek ketpiwek kar ik: “Menmen miutip wen meweninit ti hises him me God werek werek. Ti eno esiuwe menmen yapirwe mit ti ewet mit em weinim, te maain menmen mit yaaim mamu wit ke God. Ti esiuwerem epei au, ti enen ehisisa.” ²²Mitik hirak kemtau him im, hirak han kekrit pike ken hirak kine han enuk kentar hirak ketenen menmen yapirwe kinapen kakwet mit em weinim.

²³”Jisas kiwaanaan katip mit disaipel nirak kar ik: “Hiram hat tru te mit kerek netenen menmen yapirwe te hir nanwis God naanmipri.” ²⁴Hir mit disaipel nirak nemtau him mirak, hir nehinhin neriuwerem, te hirak wen ketpor, “Pipep nai, hi hetpi. Hiram hat tru te mit hir nanino wit ke God nanu nantikerek. ²⁵Hirak miyak kamel (hirak iuwe kire hos) kakno kakitet hei me tik mit nekerwo menmen neriuwerem hirak ap hat wok iuwe mar ke mit netenen menmen yapirwe hir hanhan nanises him me God te hirak naanmampri.” ²⁶Mit disaipel nirak nemtau him im, te hir han kekrit nitehiyan nar ik: “Hiram him mar im, te neimin hir nantike God nanu nanit hirak naanmampri a? Taauye!”

¹ 10:15 Mt 18:3 ^m 10:19 Eks 20:12-17; Diu 5:16-20, 24:14; Je 5:4 ⁿ 10:21 Mt 10:38, 6:20; Mk 8:34 ^o 10:23 Mk 4:19; 1Ti 6:17

27^pJisas kipiri ketpor, “Hir mit ne ti ap te nanriak menmen miutip hir nankaap hiras, te hir nanit himin yaaik hir nantike God nanu. God kerek. HIRAK God kertei menmen yapirwe hirak kakriakem kakikaap mit kakriuwerem.”

28 Pita hirak ketpiwek kar ik: “Haiu minaiwir menmen yapirwe misesit.”

29 Jisas hirak katip, “Hi hetpi werek. Mit miyapir kerek ninaaiwir witeik, o heiyuwe o kikrek o yenten o miye haai o nikerek nir nentar hir nisisa hetike him mai yaaim, hir nanu ti nanit 100 witeik, 30 heiyuwerer, kikrek, yenterer miyerer haairer, nikerek nir netike ti meiyam. Te hir mit nanrekyor enum enum nanintar hir nises him mai. Maain, hir nanit himin yaaik hir nantike God nanu nanit tipmain tipmain enum eik. 31^qIn ek mit kerek hir ninin, maain hir nankaru. In ek hir mit kerek hir nikaru o hir mit weinin, maain hir iuwe naninin mit han.”

Jisas katip wikak hirak kaki, te maain hirak pike kakikrit

(Mt 20:17-19; Lu 18:31-34)

32 Hir wen nitet yayiwe nepno wit Jerusalem, Jisas kinini ken. Mit disaipel nirak hir nertei mit iuwe neit Jerusalem hir hanhan nankip kaki, te hir han kekrit. Mit miyapir han kerek nisesik, hir ninaain. Jisas hirak pike kerp kemerir mit disaipel nirak nar hiswiyen wik (12), hirak ketpor menmen maain mit neit Jerusalem hir nanrekyiwekem. 33^rHirak ketpor kar ik: “Nikip emnep yi eiyimtaul! Haiu mamno Jerusalem. Hi Mitik ke wit ke Mitik Iuwe, mit iuwe pris kerek newet God menmen me mit, hir nantike mit ninin nertei him lo me Moses, hir nantauhis hir nehimitena hi hahi, hir nanriuweta hi eno his me mit han hir ap ne Isrel, te hir naniyep hi hahi. 34^sHir nanititaunaan hir naninikin timank mamintera, hir nanwaai nipin naniyep. Hir naniyep hi hahi, te maain wi wikak epei men, hi pike hahikrit hahu.”

Jems ketike Jon hirakit hanhan tatre mitikit iuwe

(Mt 20:20-28)

35 Jems ketike Jon hirakit nikerek hirakit te mitik niuk mirak Sebedi hirakit ten tirapit Jisas tetpiwek tar ik: “Mitik Iuwe, hawir hanhan (o weikikit) menmen hawir wituthiyem.” 36 Hirak ketpiwekit, “Hi herekyi mekam?”

37 Hirakit tetpiwek tar ik: “Ti ewisawir maain ti naanmampre mit, hawir wautikewit hawir waukepit naanmampre mit hawir wawu menep his yaaim metike his henkik mit.” 38^sHirak ketpiwekit kar ik: “Yi yepitari yi yitauhi menmen wisenum. Yi te eiwis menmen enum mamnen mamiwep mamir ke menmen enum hiram mamnen mamiyep o au?” 39^tHirakit tewenhi tar ik: “O, hawir werteyem.” Jisas ketpiwekit, “Maain menmen enum mamiwep mamir ke hiram mamiyep. 40^uTe hi ewisi yi

^p 10:27 Jop 42:2; Mk 14:36 ^q 10:31 Mt 20:16; Lu 13:30 ^r 10:33 Mk 8:31, 9:31

^s 10:38 Mk 14:6; Lu 12:50 ^t 10:39 Ap 12:2; Rev 1:9

eitikewa naanmampre mit te yi yau menep his yaaim o his henkik mai au. Hi taau. Mit han kerek God Haai kehimiteni, maain hir keriyen nanu ein nantikewa naanmampre mit.”

⁴¹Hir mit disaipel han nar hiswiyen (10) nemtewem, hir han enuk neriuwe Jems ketike Jon. ⁴²“Te Jisas hirak kari mit disaipel nirak ketpor kar ik: “Yi yertei mit kerek ninin mit naanmipror hir nenipi hir enises han kir. ⁴³“Te yi ap eiriak menmen emir im au emit. Keimin ke yi hiras kakre iuwe kakinini, te hirak kakriak menmen mi. ⁴⁴Keimin ke yi hiras hanhan kakinini kakre mitik iuwe, te hirak ekriak menmen mi weinim. ⁴⁵“Hi Mitik ke wit ke Mitik Iuwe hi ap han te hir mit nanriak menmen mai au, taauye! Hi han te hi ariak menmen me mit hi akepi. Hi hahi te hi akepi yi mit ne ti yapirwe. Hi akepi atihis te God kakiwep au. Hirak kaktip yi yaain.”

Jisas kikaap mitik hak nanamir toto

(Mt 20:29-34; Lu 18:35-43)

⁴⁶Hir nen niun wit Jeriko. Maain Jisas epei kaknaaiwir wit ik kaktike mit nirak, hir nitet yayiwe netike mit yapirwe. Hirak mitik Batimias nanamir toto hirak nikan ke Timias, hirak kau yayiwe kitehi mit nanwetiwep pewek me menmen hirak kakim. ⁴⁷“Hir mit netpiwek Jisas ke wit Nasaret epei kan, te hirak kinap keninewek kar ik: “Jisas ti Nepenyek ke maam nipu iuwe Devit, ti han etwenina ekepa.” ⁴⁸Hir mit yapirwe nenerek netpiwek hirak kekintip, te hirak au. Hirak kinap keninewek him iuwe ham kar ik: “Nepenyek ke Devit, ti han etwenina ekepa.” ⁴⁹Jisas hirak kerp ketpor kar ik: “Eninewek eiyyik einen.” Te hir nenine mitik ik nanamir toto hir netpiwek nar ik: “Ti han yaaik ehu. Ekrit. Hirak epei keninut.” ⁵⁰Hir netpiwek te hirak kenke saket kewirem miwaai ti, hirak kin kekrit kerp ken kiun Jisas. ⁵¹Jisas kitiwekhi kar ik: “Ti hanhan hi erekyut mekam?” Mitik enuk nanamir toto ketpiwek kar ik: “Mitik Iuwe, ti ekepa hi ahir ein ein.” ⁵²Jisas ketpiwek, “Ti eno we. Ti epei han kiteta hi ekepit, te ti ehu werek.” In ek kerekek hirak kir ein ein kisesik ken yayiwe eik.

Jisas ken wit Jerusalem kire mitik iuwe king

(Mt 21:1-11; Lu 19:28-40; Jo 12:12-19)

11 ¹Maain hir epei nen menep wit Jerusalem, hir nerp wit Betfasi menep miniu (o neiyip) mit nenewek neiyip ke nu Oliv. Te Jisas hirak keriuwet mitikit disaipel tirak wik, ²hirak ketpiwekit kar ik: “Yi eino wit kike pinak eik e. Yi eirekir wit kau nimin kike, te yi eiyyir donki

“ 10:42 Lu 22:25-26 √ 10:43 Mt 23:11; Mk 9:35 √ 10:45 1Ti 2:5-6 × 10:47 Mt 9:27, 15:22 √ 10:52 Mk 5:34

nikik (hirak kire hos) mit hir nekaaip waai kau teruk kirak kiyau nu. Mit hir nau sip kirak wen au. Yi eisiupaneke eyik einen. ³Mit han hir nanitihi, ‘Yi yiriak menmen im yenmak?’ te yi eyitpor eyir ik: ‘Hirak Mitik Iuwe kau kare hanhanek kaktiwek.’ Yi eyitpor eyir ek, te hir nanisiuwerek kaknen waswas.” ⁴Te hirakit ten tir hos nikik keit weipir ke winak, te hirakit tesiupaneke. ⁵Mit han nerp menep nitiwekithi nar ik: “Yi yenmak te yi yesiupan donki ik ek?” ⁶Hirakit tetpor menmen nipaa Jisas ketpiwekit, te hir newisikit hirakit teiyik ten. ⁷Hirakit teit donki teriyaak teiyik ten Jisas. Hir mit disaipel nirak newis saket mir (hiram mire laplap) miwaai menterik. Te Jisas kewik. ⁸Hir mit yapirwe newis saket miwaai ti nesese yayiwe neriuwerem. Mit han hir neremir nu heneik neiyim nen newisim miwaai yayiwe kerek hir netiwem me ni me yayiwe pinak pinak. ⁹Hir mit han ninin nen netike mit han nisesik hir ninap natip nar ik:

“Haiu emwenipi God. Mitik ik hirak kekrehir ke God te haiu hanhan God hirak kakrekiwek yaaim naanmamprewek.

¹⁰ God kakikaap mitik ik hirak menep kakinin naanmamprai haiu mit kar ke nipaa maam nipu kau Devit kinin naanmire maamrer nau. God hirak yaaik iuwe!”

¹¹ Jisas hirak ken kiun wit Jerusalem hirak ken kinik winak iuwe ke God ein. Epei hinkewi, te Jisas kerenaan kir menmen, hirak pike ken wit eik, hirak ketike mit disaipel nirak nar hiswiyen wik (12) hir pike nen wit Betani.

Jisas katip nu fik hirak ap kakine nu nikim meiyam au
(Mt 21:18-19)

¹² Teip hekrit, hirak kinaaiwir wit Betani, Jisas ninpi maak kepno. ¹³ “Hirak kir nu fik kerp yanimin ein, te hirak ken kakir nu nikim mari mewik o au. Tiwei weinim keremem. Hirak ap wepni yaaik wen au. ¹⁴ ^bTe hirak ketpiwek kar ik: “Maain ti ap ari eine nu nikim meiyam au.” Mit disaipel nirak nemtewek hirak katip.

Jisas ken winak iuwe ke God kepir mit kerek nesiuwe menmen
(Mt 21:12-17; Lu 19:45-48; Jo 2:13-22)

¹⁵ Hir nen niun wit Jerusalem, Jisas hirak ken kekrehir winak iuwe ke God. Te hirak kepir mit kerek nesiuwe menmen neit pewek mererim. Epei au, hirak kepir mit kerek neit menmen newet God em nekre winak iuwe ke God. Hirak keweikin kinaan me mit enun hir nekrehir pewek me mit ne wit ham. Hirak keweikin yeno me mit enun hir nesiuwe hore tapi men mit pris kerek newet God em. ¹⁶ Hirak ap kewis mit hir ninan menmen meit winak

^a 11:9 Sam 118:25-26 ^a 11:13 Lu 13:6 ^b 11:14 Mk 11:20

iuwe ke God nimin ein, au! ^{17c}Epei au, hirak ketpor him kar ik: “Yi ap yertei him mau tiwei me God matip mar ik: ‘Yi yertei winak kai hirak kire winak ke mit ne wit yapirwe hir naninen nanwenanipi nanitauhi menmen nanit nimin a?’ Te yi mit yiriakkek kar ke winak ke mit enun nekintip menmen.”

¹⁸ ^dHir mit iuwe Pris kerek ninin naanmipre pris han, hir netike mit hir ninin nertei him me Moses, hir nemtewek te hir nimenipin Jisas nankip nanirkeik. Hir nineinik nentar mit yapirwe hir han yaaik nanimtau him me Jisas. ¹⁹Maain menep witaan, Jisas hirak ketike mit disaipel nirak hir ninaaiwir wit nen.

Mit kerek hir han kitet God nitiwekhi menmen, hir nantiwem
(Mt 21:20-22)

²⁰ ^eWanewik hir pike nanino wit Jerusalem, hir nesipaat nu Fik. Hirak keweivei kaa. ²¹Hirak kirek te Pita han kitet menmen Jisas nepip ketpim. Te hirak ketpiwek kar ik: “Mitik Iuwe, nepip ti hatip nu fik ik enum, te hirak epei kaa.” ²²Hirak Jisas katip mit disaipel nirak kar ik: “Yi han kitet God. ²³^fHi etpi werek. Mit han nantip miniu (o neyip) ik, ‘Ekrit eno emin wan eik,’ hir ap han kitet wik au, hir han kitet menmen hiram mamnen mamir ke nipaa hir natip, menmen mamnen mamir im e. ²⁴^gTe hi hetpi werek. Menmen yi yitehi God em, yi han kitet yi eitiwem, maain yi eiyyit menmen mamir im. ²⁵^hMe wi yi eiyrp winak ke God, yi eiyyitehi God me menmen, yi eiyrtei mitik hak yi han enuk eiriuwerek, yi ap han ekitetim emit, te Haai kit God keit wit kirak hirak kakisak menmen enum yi yiriakem hirak ap han ekitetim au. ²⁶Yi wen han ekitetim, te God ap kakisak menmen enum yi yiriakem, au emit!”

Mit iuwe nitehi Jisas keimin keriuwetek hirak kiriak menmen im
(Mt 21:23-27; Lu 20:1-8)

²⁷Hirak katip epei au, hir pike nan Jerusalem. Hirak keke ti kitet winak ke God keit nimin ein, mit iuwe kerek ninin mit pris kerek newet God menmen, hir netike mit ninin nertei him lo me Moses, hir netike mit kerek hir niuk mir iuwe, hir nen nir Jisas. ²⁸Hir nitiwekhi nar ik: “Keimin keriuwetit ti hiriak menmen heit in?”

²⁹Jisas hirak ketpor kar ik: “Hi itihi menmen ham. Yi yayitpo te hi etpi keimin keriuweta hi han hiriak menmen im. ³⁰Hirak keimin keriuwet Jon hirak kikir mit neriuwe tipar? Hirak God o Jon hirekes han kitetim?”

³¹Hir natipan nar ik: “Hau mamtip God hirak keriuwetek kan in, te hirak kakitpai, ‘Yenmak te yi yemtau him mirak au?’ ³²Hau mamtip hirekes han kitetim keremem, te hir mit in nanweikin sip nanwetai.” (Hir mit iuwe

^c 11:17 Ais 56:7; Jer 7:11 ^d 11:18 Mk 14:1; Lu 22:2 ^e 11:20 Mk 11:14 ^f 11:23 Mt 17:20; Lu 17:6 ^g 11:24 Mt 7:7 ^h 11:25 Mt 5:23, 6:14-15

ninaain mit nererik nan nentar hir mit yapirwe han kitet God keriuwet Jon te hirak katip mit him mirak.)³³ Hir natipan epei au, hir natip Jisas nar ik: “Haiu ap merteyek au.” Te Jisas hirak ketpor, “Yi eyitpo keiminek au, te hi ap te etpi keimin keriuweta hi han hiriak menmen im. Taauye!”

Him me mit enun naanmipre ni me waai wain nikim

(Mt 21:33-46; Lu 20:9-19)

12¹ Jisas wen kepu winak iuwe ke God, hirak katip mit miyapir en him mire tok piksa kar ik: “Nipaa mitik hak kamir ni me waai wain nikim. Hirak kime niwa me nan keseniuwem, hirak kekin hei kewis yemti iuwe, te hirak kakintirer wain tipar, hiram mamikiuwe hei miram. Epei au, hirak kime kinaan iuwe nokim, te mit hir nanwim nanir mit enun naninen nankintip menmen. Hirak kewis mit han hir naanmiprewem. Hir naanmiprewem, hirak ken wit hak yanimin.² Maain wain nikim miram mewinki, hirak haai ke ni im e hirak keriuwet mitik kirak ken kakir mit nipaa naanmipre ni mirak, hirak kakit nikim me waai im.³ Te hir mit netenenik nakip pike nesiuwerek kehik ken.⁴ Maain haai ke ni im hirak pike keriuwet mitik hak, te hir nenep paan kirak nerekyiwek enum.⁵ Maain hirak keriuwet mitik hak, te hir nakip kaa. Te hirak keriuwet han, hir niriakem narek narek. Mit han hir naa, mit han au.⁶ Hirak wen ketenen kiutip, hirak nikan kirak. Maain hirak kesiuwerek kikaru ken. Hirak han kitet kar ik: “Hir nanimtau him mirak.”⁷ Hir mit nirek te hir natipan nar ik: “Ik ek kakit menmen me haai kirak. Haiu emkip kaki te haiu mamit menmen me haai kirak.⁸ Hir natip nar ek, hir netenenik nakip kaa, hir newir yink kirak keit witeik.

⁹ “Hirak mitik kerek kamir ni hirak kakriak mekam? Hirak kaknen kaknep mit enun in nani, hirak kakwis mit han naanmampre ni mirak.¹⁰ Yi ap yertei werek werek him me God mit nisesim mau tiwei hiram matip mar im:

‘Nu teinik kerek mit nime winak hir nineinik, hirak kerekek kaku kakre teinik mitik.

¹¹ God hirekes kiriakem, te haiu mit han kitet hiram yaaim.’ ”

¹² Hir mit iuwe ne Isrel neit winak iuwe ke God nansiuwe mit nantenen Jisas te hir ninaain mit yapirwe nererik neit ein. Hir nertei hirak kesiuwor him keriuwe him tok piksa im em. Te hir ninaiwirek nen.

Mit nitehi Jisas me mit hir nanwir pewek me takis

(Mt 22:15-22; Lu 20:20-26)

¹³ Maain mit iuwe neriuwet mit han ne Farisi kekek ninin nises him me Moses netike mit kerek nises him me Herot te hir nan nanri han ke

ⁱ 12:1 Ais 5:1-2 ^j 12:6 Mt 3:17 ^k 12:8 Hi 13:12 ^l 12:10 Sam 118:22-23; Ap 4:11
^m 12:13 Mk 3:6

Jisas. ¹⁴Hir nan niun Jisas hir nitiwekhi nar ik: “Mitik iuwe, haiu mertei ti mitik yaaik. Ti atip werek, ti han kitet haiu mit yapirwe mipiran. Ti ewepyapir him me God hatip haiu mit miyapir em keremem. Te ti etpai. Him me Moses kewisai haiu mamwir pewek me takis mamno mitik iuwe ke Rom niuk mirak Sisa o au? Haiu emwirem o au?”

¹⁵Jisas hirak kertei hir newenin him nanri han kirak neriuwerem, te hirak ketpor kar ik: “Yi yenmak te yi yaiwisisewek yairi han kai a? Yi yayit pewek kei kiutip eiyik einen hi ehirek.” ¹⁶Hir newetiwek neiyik nan newetiwekem, hirak kirem. Te hirak ketpor kar ik: “Ninaan me keimin im e? Keimin niuk mirak mewik?” Hir natip nar ik: “Mitik Iuwe Sisa kerekek.” ¹⁷Te Jisas hirak ketpor, “Yi eiwet Sisa pewek me takis mirak, te eiwet God menmen mirak.” Hir nemtewek, hir han kekrit neriuwerek.

Mit nitehi Jisas me mitik kaa maain kakikrit

(Mt 22:23-33; Lu 20:27-40)

¹⁸Maain kike mit han nises him me Sadyusi hir nan. Hir han kitet mit hir naa maain hir pike nanikrit au. Hir nen niun Jisas nitiwekhi nar ik: ¹⁹“Mitik Iuwe, Moses hirak kewis him mar im: ‘Mitik hak kaki, te mite pirak wepu, hire wine nikerek wen au, mitik heiyiuwe o nikik kaktiwe, hir naniyewan hire wawine nikerek ne mitik epei kaa.’ ²⁰Nipaa mit hispinak wik (7) ne haai kiutip hir nepu. Hirak iuwe mitik keit mite, te hirak kaa ap kine nikerek nei au. ²¹Maain niminek ketiwe hirak kaa ap kine nikerek nei au. ²²Hir narek narek kike yiu ketiwe kaa. Maain mite ip hire waa. ²³Maain hir mit yapirwe pike nanikrit nanu, hire waure mite pe keimin? Hir mit hispinak wik (7) nipaa epei netiwe ye!”

²⁴Jisas ketpor kar ik: “Yi yetari menmen yentar yi yepitari him me God metike menmen mirak iuwe. ²⁵Maain, hir mit pike nanikrit, hir nanit miyapir au. Miyapir nanit mit au. Hir nanu nanre mit ensel ne wit ke God.

²⁶“Ne mit hir pike nanikrit, yi ap yekine him Moses kewisim me nu tiwei hirak si taak ap kaa a? Hirak God katip Moses kar ik: ‘Hi God ke Ebrahim, Aisak tetike Jekop.’ ²⁷Hirak God ke mit epei naa neit au. Hirak God ke mit hir nepu. Hir naa neit au, hir nepu. Yi yepitari a?”

Him me God mit naninin nanisesim

(Mt 22:34-40; Lu 10:25-28)

²⁸Mitik kiutip ke mit kerek hir ninin nertei him me Moses natip mit em, hirak kan kemtau mit hir natipan nenehan, hirak kertei Jisas ketpor werek werek. Te hirak kitiwekhi kar ik: “Him mekam hiram iuwe minin him yapirwe nipaa God kewet Moses em hirak kewisim te haiu emisesim?”

ⁿ 12:17 Ro 13:7 ^o 12:18 Ap 23:8 ^p 12:19 Diu 25:5 ^q 12:26 Eks 3:2, 6

29^rJisas ketpiwek kar ik: “Him hiram iuwe minin him ham hiram im: ‘Yi mit ne Isrel nikip emnep eyimtau! Mitik Iuwe God hirak kiutip kerekek. 30^sYi hanhan Mitik Iuwe God eiriuwe han ki ketike himin ki.’ 31^tHim mises him ham minin hiram im: ‘Yi hanhan eiriuwe mit han nar ke yi hanhan hiras.’ Him wik im minin, him ham yapirwe hiram mikaru.”

32^u‘Mitik ik kerek kertei him lo me Moses, hirak katip kar ik: “Mitik Iuwe ti atip werek. Ti atip hirak God hirak kiutip. Hirak kerekek kepu. Han au. 33^v“Hiau hanhan Mitik Iuwe God keriuwe han kai mamir ke hiau hanhan hiras, te im minin menmen hiau si tatim mamwet God em o menmen hiau mewepwarem mewet God em.”

34^wHirak katip epei au, Jisas hirak kertei hirak mitik katip werek, te hirak ketpiwek kar ik: “Ti han kit yaaik te ti hises him me God werek werek.”

Hirak katip epei au, mit han hir ninaain nanitiwekhi menmen ham.

Jisas kitehi mit hir han kitet Krais hirak keimin

(Mt 22:41-46; Lu 20:41-44)

35^x Jisas wen katip keit winak iuwe ke God, hirak kitehi mit kar ik: “Nenmak mit kerek hir ninin nertei him lo me Moses hir natip Mitik Krais kerek God kehimitanek hirak Nepenyek ke Devit kerekek? 36^y“Nipaa God Himin Yaaik kikiak han ke Devit te hirak kewis him mau tiwei kar ik: ‘Mitik Iuwe God katip Mitik Iuwe kai Krais kar ik: “Ti hau menep his yaaim mai ere hi enep mit enun nepan nit hi ehinini.” ’ 37^z“Devit hirak hirekes kenewek Mitik Iuwe kirak. Te hirak karkeik hirak kire Nepenyek ke maam nipu kirak Devit kerekek a?” Te mit miyapir yapirwe hir han yaaik nemtau him mirak.

Jisas kene mit kerek ninin nertei him lo me Moses

(Mt 23:1-36; Lu 11:37-54, 20:45-47)

38^{aa} Jisas hirak wen katip mit miyapir him mirak hirak ketpor kar ik: “Yi naanmampre hiras me mit kerek hir ninin nertei him me God. Hir nare nanino ein ein, hir neriuwet saket yaaim nokim me mit kerek hir netenen pewek yapirwe netike mit hir nertei menmen iuwe. Hir han yaaik te mit miyapir nanitpor, ‘Haai, ti epei han?’ neit wit maket kerek mit nesiuwe menmen. 39^{ab}Hir nanu yeno ne mit niuk mir iuwe neit winak ke God, hir nanu yeno ne mit niuk mir iuwe neit winak ke mit hir nanim menmen. 40^{ac}Hir newises miyapir kerek mit nir epei naa. Hir nari winak mir metike menmen mir yapirwe. Hir prea yapirwe hir newises mit ek te mit yapirwe natip hir yaain. Maain God hirak kaknip wisenum!”

^r 12:29 Diu 6:4-5 ^s 12:31 Lev 19:18; Ga 5:14; Ro 13:9; Je 2:8 ^t 12:32 Diu 4:35; Ais 45:21

^u 12:33 Diu 6:5; 1Sml 15:22; Hos 6:6 ^v 12:36 Sam 110:1 ^w 12:37 Lu 19:48

Mite enu menmen aurep hire wewet God menmen
(Lu 21:1-4)

⁴¹xJisas katip epei au, hirak ken kir tikenup mire bokis me mit hir newir pewek mekrerem newet God em. Tikenup mire bokis miwaai ein, hirak Jisas kau kereptim keit in. Hirak kir mit yapirwe newir pewek mekrerem. Mit han netenen pewek yapirwe newir pewek yapirwe. ⁴²Mite piutip menmen aurep hire wetenen pewek kike, te hire wewir pewek wik mire toea miutip. ⁴³yJisas hirak kenine mit disaipel nirak hirak ketpor kar ik: “Hi etpi werek. Mite ip hire wewir pewek hiram minin pewek me mit kerek hir newir pewek yapirwe mekrerem. ⁴⁴Hir newir pewek ham mekre tikenup mire bokis, te meiyam wen mepeit winak mir. Hir newirem nanit menmen. Te hire au. Hire wetenen pewek wik wewirem epei au, hire wawu weinim. Hire wawit menmen wawim taauye! Meiyam meit winak kire au.”

Jisas katip mit naniwaank winak iuwe ke God
(Mt 24:1-2; Lu 21:5-6)

13 ¹Jisas hirak kinaaiwir winak iuwe ke God kakno witeik, hirak mitik hak disaipel kirak ketpiwek kar ik: “Mitik Iuwe ehirem. Nan im yaaim. Winak im yaaim.” ²zJisas ketpiwek kar ik: “Ti ehir winak yapirwe im e? Maain nan im mit han naninen hir nanwenem mamwaai ti weinim.”

Jisas katip maain menmen enum mamnen
(Mt 24:3-14; Lu 21:7-19)

³Hir nen nau miniu (o neiyip) mit nenewem neiyip me nu Oliv hiram menep winak iuwe ke God pinak ein. Te Pita, Jems, Jon, tetike Andru hirakit tan menep titiwekhi him tar ik: ⁴“Ti etpai me wi God kehimitan menmen im hiram mamnen. Mekam maminin mamnen te haiu mamirtei God kakriakem?” ⁵Jisas ketpor him mirak mar im: “Yi naanmampre hiras te hir mit nanwisiyek au. ⁶“Mit yapirwe hir naninen nanikrehir kai nantip mit miyapir ne ti nanir ik: ‘Hi Mitik Iuwe Kraiss kerek God kehimitena hi han kerekek.’ Hir nanwisorek hir nanisesi. ⁷Maain yi eiyimtau him me mit hir nantip mit hir naninepan menep o mit naninepan yanimin, yi ap han ekikrit ein ein au emit. Menmen im maminin mamnen te wi epei mamnen wen au. ⁸bMit ne weiwik ham hir netike mit ne weiwik ham hir naninepan. Mit ne wit hak nantike mit ne wit hak hir naninepan. Ti kaktanik heriyai heryiyai. Hawi au te ni

x 12:41 1Kin 12:9 y 12:43 2Ko 8:12 z 13:2 Lu 19:44 a 13:6 Jo 5:43 b 13:8 Ais 19:2; 2Kro 15:6

meiyam mami mamit menmen au. Menmen enum im maminin mamnen te maain God skelim mit me menmen enum hir niriakem. Hiram mar ke mite weteiknen. Maain hire wawine nikan.

⁹“Yi naanmampre hiras me menmen im e. Maain hir mit nantihis naniryi yi yaino winak ke kaunsil. Hir nanit nipin naniwep yayit winak ke God. Yi yayirp yayit winak ke kaunsil me gavman nantike mit han ninin naanmipre wit heriyai heriyai yayintar yi yises him mai. Te yi eiyitpor menmen mai. ¹⁰Yi eiyitpor him mai maminin, te mit nerer wit wit hir nanimtwem. Te maain wi enum mamnen. ¹¹^d eMaain yi eiyirp winak ke kaunsil yi han ekitet yapirwe him mekam yi eiyitpor au emit! Menmen God Himin Yaaik kakitpiyem kakwetiyem, yi eiyitpim. Menmen me han ki au. Taauye! ¹²Heiyiuwerer nanwet mit enun kikrek nir hir naninip nani. Haairer nanwet mit enun nikerek nir, nikerek han nanwet mit enun haairer o miyerer hir mit naninip nani. ¹³^fMaain mit yapirwe hir han enuk nineini nanintar yi yises him mai. Te neimin nanu nanit nanisisa ere hir nani, maain hi etorhis hir nanu nantikewa haiu mamu mamit wit ke God.

Maain menmen enum enum mamnen

(Mt 24:15-28; Lu 21:20-24)

¹⁴^g“Maain yi yayir menmen enum mamiwaank wit mamtike mitik hirak kakirp wit kerek God keriuwesisek. (Mit kerek nekine tiwei ik nikip emnep yi han ekitet menmen im werek werek.) Yi mit miyapir yayu provins Judia me wi im yi eirir eino einiu miniu o neiyip. ¹⁵^hMitik kerek kau kentar winak siup, hirak ekikiuwe eknen ekirp ti, hirak ap kakno winak nimin ein kakit menmen au emit! Hirak ekirir ekno waswas kerekek. ¹⁶Mitik hak keit ni hirak pike kakweikin kakit saket mirak au, emit! Hirak kakrir waswas kerekek. ¹⁷ⁱMiyapir kerek hir nepitu o miyapir hir newet nikerek nim hir naam, menmen im enum mamnen mamiwaanki. ¹⁸Yi eiyitehi God te menmen im mamnen wi me hawi hitan au emit! ¹⁹^jMaain me wi eim, hir mit menmen mamiwaanki iuwe. Nipaa wi God kewis ti ketike nepni ere in, menmen ap mewaank mit nanir ke menmen im mamiwaanki au. Wi eim epei man, maain menmen mamiwaank mit nanir im taauye! ²⁰God hirak keremir wi im au, te mit yapirwe hir nani naninektin te wit weinik. Te hirak keremir wi yinam me mit nipaa hirak kehimiteni hir nirak, hir nises him mirak hirak kakikepi.

²¹“Maain wi eim e, te mitik hak kakitpi kakir ik: ‘Eiyirek, hirak Mitik Kraiss hirak keit in.’ O mitik hak kakitpi, ‘Hirak kerp ein.’ Yi ap eiyimtau

^c 13:9 Mt 10:17-20 ^d 13:11 Lu 12:11-12 ^e 13:11 Mt 10:19-22 ^f 13:13 Jo 15:18-21

^g 13:14 Dan 9:27, 11:31, 12:11 ^h 13:15 Lu 17:31 ⁱ 13:17 Lu 23:29 ^j 13:19 Dan 12:1; Joe 2:2; Rev 7:14

him im au emit! ²²^kMit enun tawewai (o newenin him) naninen nanitpi, 'Hi Mitik Kraiss' o hir nantip, 'Hi mitik profet hi ewepypir menmen me God.' Hir nanriak mit menmen yaaim nipaa hir nirem au mamit nepni o nanit ti. Hir nanriakem te hir nare nanri han ke mit God kehimiteni hir nirak, hir nanwisorek nanises him mir, te hir au taau. ²³Yi naanmamre hiras. Maain menmen mamnen mamir ke hi epei etpiyem.

Maain hi Mitik ke wit ke Mitik Iuwe hi pike anen

(Mt 24:29-31; Lu 21:25-28)

²⁴^l"Maain wi im, menmen enum mamiwaank mit epei au, wepni kakir iuwe au, hirak kakweikin kakre witaan, wenke ap te kakir taau. ²⁵Hir hiram mau nepni hiram maminke, menmen eim meit nepni hiram mamtanik. ²⁶^mMenmen im epei man, te hir mit nanira hi Mitik ke wit ke Mitik Iuwe hi anen ewepypir hirekes akre napi ke nepni. Menmen me haai merhihe mewepna, hi anen ehinin naanmampre mit. ²⁷"Hi esiuwe mit ensel ne wit ke God hir nanino nanrer wit wit nanithis mit miyapir hi ehimiteni hir nises him mai.

Nu fik meteiknai menmen me wi maain menmen mamnen

(Mt 24:32-35; Lu 21:29-33)

²⁸"Nu fik hiram meteikni menmen me wi maain menmen mamnen. Maain wi kerek heneik miram hiram mamsiunen, yi eyirtei menep te wepni yaaik. ²⁹Mar nu im, maain yi yayir menmen im hi hetpiyem hiram mamnen, yi eyirtei hi Mitik ke wit ke Mitik Iuwe menep te hi pike anen. ³⁰Hi hatip werek. Mit miyapir in ek nepu nepeit, hir ap te nani ere menmen im hi hetpiyem hiram mamnen. ³¹Nepni metike ti mamwep mamweikin mamre nime mamiwaank mamit te him mai au mamu mamnen mamir ke hi hetpim.

Mit hir ap nertei me wi menmen im mamnen au

(Mt 24:36-44; Lu 17:26-30, 34-36)

³²^o"Me wi menmen im mamnen, mit hir nepitariyem, mit ensel ne wit ke God hir nepitariyem, hi Mitik ke wit ke Mitik Iuwe hi epitariyem. God Haai kerekek hirak kerteiyem. ³³^pYi naanmampre hiras. Yi yepitari wi menmen im mamnen. ³⁴Menmen mamnen mamir ke mitik iuwe hak kakno yanimin. Te mit nirak nepitari wi mekam hirak pike kaknen. Hirak kehimitan mit hir naanmipre winak kirak, hirak katip mitik hirak naanmipre wepir ke niwa ke wit kirak. Hirak ketpiewek him iuwe hirak naanmiprewerek werek werek. ³⁵^qTe yi mit naanmamre hiras werek werek. Yi yepitari wi me Haai

^k 13:22 Diu 13:1-3; Rev 13:13 ^l 13:24 Ais 13:10; Rev 6:12-14, 8:12 ^m 13:26 Rev 1:7

ⁿ 13:27 Mt 13:41 ^o 13:32 Ap 1:7 ^p 13:33 Mt 25:13-14 ^q 13:35 Lu 12:36-38

ke winak hirak pike kaknen. Hirak kaknen witaan o wi nimin o wanewik toto o wepni o hinkewi, yi yepitariyek. ³⁶Yi naanmipre hiras te hirak kaknen wasenum kakri yi yaiwaai yi ap yayises him mirak au. ³⁷Menmen hi hetpiyem, hi hetpiyem mamno mit miyapir yapirwe. Yi yapirwe naanempre hiras! Yi yepitari wi mekam hi Mitik ke wit ke Mitik Iuwe hi pike anen.”

Mit nime nipin natip hir naninep Jisas

(Mt 26:1-5; Lu 22:1-2; Jo 11:45-53)

14 ¹Wi wik mepeit ere wi mit hir han tewenin wi Pasova kerek nipaa God kenep mit ne Isip hir naa te mit ne Isrel au. Mit hir newis yis mekre bret mir me wi im au. In ek hir mit pris iuwe kerek ninin mit pris han kerek newet God menmen me mit, hir netike mit hir ninin nertei him lo me Moses hir nererik nime nipin Jisas nisawin nemitiwepin nantiwekhis nankip kaki. ²Hir natip nar ik: “Wi haiu wen han tewenin menmen me wi Pasova, haiu ap te mamtiwekhis mamkip au. Haiu mamriakem te mit yapirwe hir nantikewai haiu mamnepan.”

Maria wewen sanda mekiuwe paan ke Jisas

(Mt 26:6-13; Jo 12:1-8)

³Me wi im Jisas hirak keit wit Betani hirak kepu winak ke Saimon nipaa lepro mewik. Hirak wen kepu yeno kaam menmen, mite piutip hire wan wetenen min tipar me nu nad nekenpi mirak minin yaaim mekretek. Mit hir newir pewek yapirwe me menmen im. Hire weket him mirak wewen tipar mentar paan kirak. ⁴Hir mit han nepu en hir natipan main main han enuk nar ik: “Wenmak te hire wewen tipar im wewenem weinim? ⁵Hire wewen tipar im au, te mitik hak kaksiuwerem kakit 300 kina kakwet mit enum menmen auri, hir nantiwem.” Hir han enuk te hir nenerep. ⁶Te Jisas keneri katip kar ik: “Yi eiwisiye ewit! Yi yenmak te yi yerekyiwe enum. Hire werekyo menmen yaaim. ⁷Hir mit enun netenen menmen auri, hekrit hekrit hir nau netikewi. Wi ham yi han ki yi eikepi. Te hi ap ehu etikewi me wi yapirwe, te yi yairekyo menmen yaaim au. ⁸Mite ip hire hanhan wiriakem hire epei werekyewem. Hire weremani maain mit hir nanwisa hi awaai ehikre hei. ⁹Hi hetpi werek. Wit heriyai heriyai kerek mit hir nanimtau him yaaim mai, mit hir nanirtei menmen mite ip hire werekyewem, hir han kitetim hir han teweninep.”

Judas katip mit iuwe ne Isrel hirak kakikepi hir nanithis Jisas

(Mt 26:14-16; Lu 22:3-6)

¹⁰Jisas katip epei au, Judas ke wit Iskeriot hirak mitik kiutip ke mit disaipel hiswiyen wik (12) kerek nises him me Jisas, hirak ken witeik.

† 14:1 Mk 11:18; Hi 11:28 § 14:3 Lu 7:37-38 † 14:7 Diu 15:11 † 14:8 Jo 19:40

Hirak ken kiun mit iuwe ne pris kerek newet God menmen me mit, hirak kewepyapir Jisas kakwetirek. ¹¹Hir mit en nerteiyek, hir han yaaik, hir natip Judas hir nanwetiwewek pewek mamrerim. Hirak kinaiwiri ken han kitet hirak kakwetirek kakirkeik.

Jisas ketike mit disaipel nirak naam menmen me Pasova

(Mt 26:17-25; Lu 22:7-14, 21-23; Jo 13:21-30)

¹²Maain wi miutip me wi mit hir ap newis yis mekre bret au, wi me Pasova kerek hir nenep sipsip mar ke nipaa mit hir nenep sipsip te God kenep maamrer au, Jisas mit nirak nitiwekhi nar ik: “Ti are eriuwetai haiu mamno nein te haiu emrutmani menmen me wi Pasova?” (Wi Pasova hiram wi mit hir han tewenin God hirak kenep mit ne Isip te maamrer ne Isrel au.) ¹³Te Jisas hirak keriuwet mitikit wik te mit disaipel nirak hirak ketpiwekit kar ik: “Yi yaino wit Jerusalem yi eiyir mitik hak keremime min tipar mekrerem, hirak kaksipeti. Te yi eiyisesik. ¹⁴Yi eiyisesik einowinak kerek hirak kakno kakikrerek, yi eiyitehi mitik ke winak ik eiyir ik: ‘Mitik luwe kawir hirak kituthi haau meiyam miutip meit nimin weinim te haiu mit disaipel nirak mamtikerek emu mamim menmen kerekek me wi Pasova mamwi?’ ¹⁵Te hirak kakteikni haau miutip weinim kau niu kerek yeno metike kinaan mekrerek. Ein e yi eiraimani menmen te haiu mamim.” ¹⁶Hirak ketpiwekit menmen te hirakit ten wit Jerusalem, hirakit tir menmen mar ke nipaa Jisas ketpiwekitem. Te hirakit temani menmen me Pasova wi hir han tewenin nipaa God kenep maamrer nir au.

¹⁷Maain hinkewi, hirak Jisas ketike mit disaipel nar hiswiyen wik (12) hir nen winak. ¹⁸Hir wen naam menmen nau yeno em, Jisas hirak ketpor kar ik: “Hi hetpi werek. Mitik hak kiutip (o mitik keiyak) ke yi mit yi yaam menmen yetikewa hirak kakwepayapir hi eno his me mit enun.” ¹⁹Hir nemtewek, hir han kekrit nine han enuk, hir niutip niutip nenepepan nitiwekhi ere hir nepnepik hir nitiwekhi nar ik: “Hi ewepityapir o au?” ²⁰Hirak ketpor kar ik: “Hirak mitik kiutip ke yi mit hiswiyen wik (12), hirak kiutip kaam menmen mekre sak kerepta. ²¹Hi Mitik ke wit ke God hi ano hahi ahir ke him me God mau tiwei hiram metpim. Te hirak mitik kerek kakwepayapir hirak kakiwaank hirekes. Nipaa miye pirak ap winaak te hiram yaaim. Te hire epei winaak te in ek hirak kakiwaank hirekes.”

Jisas kewet mit disaipel nirak komunion hir naam

(Mt 26:26-30; Lu 22:15-20; 1Ko 11:23-25)

²²Hir wen naam menmen, Jisas keit bret kitehi God katip hirak yaaik. Te hirak kewepik kewet mit ek ketpor kar ik: “Yi eitiwek eiyik. Ik hirak

† 14:12 Eks 12:6, 14-20 † 14:18 Sam 41:9

yink kai.” ²³Hir naak, mar keremem te hirak keit wa hesnu tipar wain mekrerek, hirak kitehi God katip hirak yaaik. Te hirak kewetirek hir naam tipar wain mekre wa hesnu. ²⁴*Te hirak ketpor kar ik: “Im em hiram hemkre mai. Hi enip him ham yaaim kontrak mamike wit ke God mamnen. Hemkre mai mamwen te hi akaap mit miyapir ariuwere. ²⁵Hi hetpi werek. Hi ap pike ehim tipar wain ere wi maain hi ehim tipar wain yaaim nimnam mamit wit ke God.” ²⁶Hirak katip epei au, hir nine henye. Hir nine henye, te hir nen witeik ninaaiwir wit Jerusalem, hir niniu nen miniu (o neiyip) ke nu Oliv.

Jisas katip Pita maain hirak kakweikin sip kakwetiwek
(Mt 26:31-35; Lu 22:31-34; Jo 13:36-38)

²⁷In ek Jisas ketpor kar ik: “Maain kike yi yainaipisa. Him me God hiram matip mar im: ‘Hi God hi enep mitik naanmipre sipsip, hiram mamrir mamno heriyai heriyai.’ ²⁸Maain, God hirak kakikoya hi pike ekrit, hi ehinini hi ano provins Galili.” ²⁹Pita ketpiwek him iuwe kar ik: “Hir mit in naninapisit nanrir te hi au. Taauye!” ³⁰Jisas ketpiwek kar ik: “Hi hetput werek. Witaan ik ek, suware kaktip wik wen au, ti erupakin wikak atip mit hi epitari hirak keimin.” ³¹Te Pita katip him iuwe, “Hi hahi etikewit hi hahi, te hi aritpakin au. Taauye!” Hir mit nirak yapirwe natip narek.

Jisas kitehi God menmen keit ni Getsemani
(Mt 26:36-46; Lu 22:39-46)

³²^bHir natip epei au, hir nen wit ni meitai niuk mirak Getsemani. Jisas hirak katip mit nirak kar ik: “Yi eiyu in hi eno ehitehi God.” ³³Hirak keit Pita, Jems tetike Jon, hirakit tetikerek ten wit hak. In ek Jisas hirak menmen menepiwek hemkre, hirak kine han enuk. ³⁴Te hirak ketpiwekit kar ik: “Hi hine han enuk ere hi hahi. Hi hanhan hirekes wisenum.” ³⁵Hirak ken kike kiwaai ti kitehi God te menmen enum im mamsiurirek mamno. ³⁶^dHirak kitehi God kar ik: “Haai kai ti hertei hiriak menmen yapirwe. Ti esiuwe menmen enum im mamno emnopin emkeipo. Te hi hises han kai au, han kit.”

³⁷Hirak katip epei au, hirak ken kir mitikit tirak tipwaai. Te hirak kene Pita kar ik: “Saimon ti hiwaai a? Ti ap epu naanmipre mit naninen me wi kike au a? ³⁸^eYi naanmipre mit naninen. Yi eiyitehi God te hirak Seten ap te kakinini yi eiweikin sip eiweto. Yi han ki yaaik, te yink ki au kinapen kaki kaktikewa.” ³⁹Hirak katip epei au, Jisas pike ken ein kitehi God

* 14:24 Eks 24:8; Sek 9:11; Jer 31:31-34; 1Ko 10:16; Hi 9:20 ^y 14:27 Mk 14:50; Sek 13:7 ^z 14:28 Mt 28:16; Mk 16:7 ^a 14:31 Jo 11:16 ^b 14:32 Jo 18:1 ^c 14:34 Jo 12:27
^d 14:36 Ro 8:15; Ga 4:6; Mk 10:38; Jo 6:38 ^e 14:38 Lu 11:4; Mt 6:13

menmen kerek nipaa hirak kitiwekhiyem. ⁴⁰Hirak pike ken kiun mitikit tirak, te hirakit au pike tiwaaai nanamir mekses. Hirakit tekrit tepitari tetpiwek mekam taauye. ⁴¹Hirakit yink enuk hirak pike ken kan hirak ketpiwekit kar ik: “Yi wen yiwaaai yinatn a? Epei werek emit! Eiyirek! Wi epei man te hi Mitik ke wit ke Mitik Iuwe hirak mitik hak kakwepayapir hi eno his me mit han nanrekyyo enum hir nantenina. ⁴²Eiyikrit haiu emno. Yi eiyirek! Mitik kewepayapir epei kan keit in.”

Mit enun nan neithis Jisas

(Mt 26:47-56; Lu 22:47-53; Jo 18:3-12)

⁴³In ek hirak wen katip, Judas hirak kan. Hirak mitik kiutip ke mit disaipel nar hiswiyen wik (12). Hirak ketike mit yapirwe hir netenen hine metike paap yoki. Hir mit iuwe ne Pris kerek newet God menmen me mit, hir netike mit ninin nertei him lo me Moses, hir netike mit iuwe ne Isrel, hir nesiuwe mit in nan. ⁴⁴Nipaa hirak mitik Judas kerek kewepayapirek hirak ketpor kar ik: “Hirak mitik kerek hi eiyewewik emiwek tekep mirak, yi eitiwekhis eitenenik eiriyaak eiyik eino.”

⁴⁵Judas kan kiun Jisas hirak katip kar ik: “Mitik Iuwe.” Te hirak keiyewewik. ⁴⁶Te hir mit han nan neithis Jisas netenenik.

⁴⁷Te mitik kiutip kirak kerek kerp menep hirak ketenen hine ke his nokik, te hirak kiwaaai hine kesipe nikip me mitik hak enuk eik. Mitik iuwe ke mit pris kerek newet God menmen me mit, mitik kirak kiriak wok mirak weinim, hirak mitik ik ke Jisas hirak kesipe nikip mirak.

⁴⁸Hirak Jisas kene mit han enun ein ketpor kar ik: “Yi epei yan yetauhis eiriuwe hine metike paap yoki yar ke yi yeithis mitik enuk kekintip menmen a? ⁴⁹Hekrit hekrit hi etikewi haiu mepu winak iuwe ke God hi ewepayapir him mai. Te yi yetauhis auye! Yi yiriak menmen im te him me God mit newisim mau tiwei hiram mamnen mamir em.” ⁵⁰Hirak katip epei au, hir mit disaipel nirak hir ninaiwirek nirir nen.

Mitik pipiak hak kiutip hirak kirir ken

⁵¹Mitik pipiak hak kiutip kerek kises Jisas, hirak kamir laplap mire hike misanu traup mirak. Hir mit han nantiwekhis, ⁵²te hirak kehiresiuri kenemtin laplap mirak hirak ke puk weinik kirir ken.

Jisas kewepayapir hirekes keit kaunsil

(Mt 26:57-68; Lu 22:54-55, 63-71; Jo 18:13-14, 19-24)

⁵³Hir mit nari Jisas nen niun mitik iuwe hetpris kinin naanmipre mit pris kerek newet God menmen me mit. Mit iuwe pris yapirwe newet God menmen me mit, hir netike mit niuk mir iuwe, hir netike mit hir ninin nertei him lo me

^f 14:49 Lu 19:47, 21:37; Jo 18:20 * 14:50 Mt 26:31

Moses, hir nererik nau ein nemeriyewek. ⁵⁴Hirak Pita ketepik yanimin, hirak ken kekre niwa ke winak ke mitik iuwe kinin mit pris han. Hirak ketike mit kerek naanmpire winak enuk hir nau si neminin his hit men si.

⁵⁵Hir mit pris iuwe kerek newet God menmen me mit, hir netike mit han ne kaunsil hir ninatin mit nesiuwe him Jisas, te hir nankip kaki, te hir ninapin menmen enum hirak ketpim au. ⁵⁶Mit yapirwe nesiuwe him Jisas neweniwek him te him mir ap mipiram au. ⁵⁷Mit han nerp newenin him natip nar ik: ⁵⁸^h“Haiu memtewek hirak katip, ‘Hi ewep winak iuwe ke God mit nimaak, te maain wi wikak hi pike eimaak mit ap te nanimaak taau.’” ⁵⁹Him me mit in hiram ap mipiram au.

⁶⁰Hirak mitik iuwe hetpris kerek kinin naanmpire mit kerek newet God menmen me mit, hirak kerp kekreri kitehi Jisas kar ik: “Ti pike etpai au a? Nenmak te hir mit in neswut him a?” ⁶¹ⁱJisas hirak kekintip ketpor au. Mitik iuwe hetpris hirak pike kitiwekhi kar ik: “Ti mitik Krais kerek God kehimitenit, ti Nikan ke Mitik Iuwe kerek haiu mewenipiyek o au a? Ti etpai!” ⁶²^jJisas hirak ketpiwek kar ik: “Hi hirekes kerekek. Maain yi eyir hi Mitik ke wit ke Mitik Iuwe hahu menep his yaaim me God kerek hirak Iuwe tokik keit, hi anen ekre napi me nepni.” ⁶³Mitik iuwe hetpris hirak kepipir kari saket mirak kewepim katip hisiuwe kar ik: “Menmak te haiu mamri mit han nansiuwek him a? ⁶⁴^kyi epei yemtau hirak katip enum kekrehir ke God. Yi han kitet mekam a?” Hir yapirwe natipan nar ik: “Hirak kiriak enum hirak eki.”

⁶⁵In ek mit han nenikin timank menterik, hir newepniwek ninaan meriuwe laplap, te hir nakip neriuwe his mir nititiweknaan natip nar ik: “Keimin kitep a? Ti profet te ti etpai.” Mit han hir naanmpire weipir nen niwaaihis nenepiwek tekep.

Pita kepakin Jisas katip hi hepitariyek
(Mt 26:69-75; Lu 22:56-62; Jo 18:15-18, 25-27)

⁶⁶Hirak Pita wen kepu witeik keit niwa ke winak, mite piutip wiriak menmen me mitik iuwe hetpris, ⁶⁷hire wan wir pita kau si keminin his hit men si. Hire werp menep wetpiwek war ik: “Ti hirekes hetike Jisas ke wit Nasaret yi epei yariyakit.” ⁶⁸Te Pita kiune him katip, “Henmak te ti hitauhi menmen im? Hi hepitariyek.” Hirak katip epei au, hirak ken kerp ya weipir. Te suware katip. ⁶⁹Mite wen wipirek pike watip mit han nerp menep war ik: “Hirak mitik kises him me Jisas kerekek.” ⁷⁰Pita pike kiune him katip, “Hi hepitariyek.” Maain kike, mit hir nerp menep natip nar ik: “Ti hises him mirak kerekek. Ti hirekes mitik ke provins Galili.” ⁷¹Pita katip him iuwe ketpor kar ik: “Hi epitari mitik hak yi yitauhiyek au. Hi atip werek au, te God hirak kaknen kakiyep.” ⁷²^lHirak

^h 14:58 Jo 2:19-21 ⁱ 14:61 Mk 15:5; Lu 23:9 ^j 14:62 Sam 110:1; Rev 1:7 ^k 14:64 Jo 19:7
^l 14:72 Mk 14:30

katip epei au, hirak suware pike katip. Te Pita hirak han kitet menmen Jisas nipaa ketpiwek kar ik: “Maain suware katip wik wen au, ti tewen eraupakin wikak.” Hirak han kitetim te hirak kine han enuk kikit.

Hir nesiuwe him Jisas kerp ninaan me mitik iuwe gavman Pailat

(Mt 27:1-2, 11-14; Lu 23:1-5; Jo 18:28-38)

15 ^{1m}Wanewik toto, mit iuwe pris kerek newet God menmen me mit, hir netike mit iuwe hir netike mit ninin nertei him lo me Moses, hir netike mit han yapirwe ne kaunsil hir han kitetim natipan. Epei au, hir nesenkek Jisas his mirak neriyaak neiyik nen newet mitik iuwe gavman Pailat ek. ²Pailat hirak kitiwekhi kar ik: “Ti Mitik Iuwe King ke mit ne Isrel o au?” Jisas ketpiwek kar ik: “Hirak him mit.” ³Mit iuwe pris kerek newet God menmen me mit, hir nesiuwe him Jisas yapirwe. ⁴Te Pailat kitehi Jisas kar ik: “Ti pike etpor au a? Hir neswut him yapirwe.” ⁵ⁿJisas kekintip, te Pailat han kekrit keriuwerek.

Mitik Pailat katip mit hir nanwis nil emu his me Jisas

(Mt 27:15-26; Lu 23:13-25; Jo 18:39–19:16)

⁶Tito yapirwe nipaa ein me wi im mit hir nehis nempep menmen me Pasova hir nitehi Pailat hirak kakikaisiu weipir ke mitik hak nipaa hirak ken kekere winak enuk. ⁷Mitik hak niuk mirak Barabas hirak kepu winak enuk ketike mit enun yapirwe nipaa hir netike mit ne gavman hir nenepan, hir nenep mitik kiutip kaa. ⁸Hir mit yapirwe nen niun Pailat nitiwekhi hirak kakriak menmen nipaa ein hirak kipriakem. ⁹Hirak ketpor kar ik: “Yi han yaaik te hi eweti Jisas Mitik Iuwe ke Isrel hirak kaknen?” ¹⁰Hirak kertei mit iuwe pris kerek newet God menmen me mit hir epei newetiwek Jisas nentar hir hemkre menepam han enuk neriuwerek. ¹¹Hir mit pris nikiak han ke mit yapirwe te hir nitehi Pailat ke Barabas. Jisas au. ¹²Pailat pike kitorhi kar ik: “Hi eweti Barabas, te hi ariak mekam heriuwe mitik yi eiwis niuk mirak Mitik Iuwe King ke Isrel a?” ¹³Hir pike natip nar ik: “Ti ewenkek Jisas ekintar nu tentarakit.” ¹⁴Pailat ketpor kar ik: “Hi henmak? Hirak kiriak mekam enum?” Te hir wen ninap nenine his iuwe natip nar ik: “Ti ewenkekik ekintar nu tentarakit.” ¹⁵Pailat hanhan kakriak mit hir han yaaik. Te hirak kewetir mitik Barabas. Hirak katip mit mirak hir naninep Jisas nanriuwe nipin. Hir nakip neriuwe nipin, Pailat hirak keriuwetek ken mit soldia nirak te hir nanino nanwenkek Jisas kakintar nu tentarakit.

Mit soldia hir nitetnaan Jisas

(Mt 27:27-31; Jo 19:2-3)

¹⁶Mit soldia ne ami hir neit nimin winak ke mitik iuwe, hir nari Jisas neiyik nen haau hak. Hir nenine mit han, ^{17p}te hir neriuwet Jisas saket mire yiwir, hir nime wiwir tiktik enuk newisik keweikin paan kirak. ¹⁸Hir nerp netpiwek nar

^m 15:1 Lu 22:66 ⁿ 15:5 Ais 53:7; Mk 14:61 ^o 15:11 Ap 3:13-14, 13:38 ^p 15:17 Lu 23:11

ik: “Haai, Mitik Iuwe King ke Isrel, ti epei han.”¹⁹Epei au, hir nenep paan kirak neriuwe niuk, hir nenikin timank menterik, nitehir nemipin newenipiyek.²⁰Hir nititiweknaan nenwesisek ere werek, hir neriuwetek (o neresiwiek) saket mire yiwir, hir pike newis saket mirak menterik, hir neiyik nanino nanwenkekik kakintar nu tentarakit.

Mit newenkek Jisas kau nu tentarakit
(Mt 27:32-44; Lu 23:26-43; Jo 19:17-27)

²¹ Mitik hak niuk mirak Saimon hirak haai ke Rufas ketike Aleksanda, hirak ke wit Sairini, hirak kepnen ni menep. Hir mit soldia hir neit nu tentarakit neiyik nimaasik hirak ekikerir nu ik ke Jisas.

²² Hir nari Jisas neiyik nen niun wit niuk mirak Golgota. Haiu meweikin him haiu matip “Wit Paan Hesnu”.²³ Hir newet Jisas tipar wain marasin mekrerem, te hirak yink kirak kekek au. Hirak kinapen te hirak kaam au.²⁴ Hir mit newenkekik kentar nu tentarakit, hir neit menmen mirak neretit satu neiyik nir menmen hir nantiwem.

²⁵ Wen hekrit iuwe wepni kehin kiniu kan, hir newenkekik.²⁶ Hir newis him mentar nu nenmak hir newenkekik nesiuwerek. Hir neiyim nen newisim mau men paan kirak. Him im matip mar ik: “IK EK HIRAK MITIK IUWE KING KE ISREL.”²⁷ Hir newenkek mitikit enukit raskel wik tiriak enum tetikerek. Hirak mitik kau ken ke his yaaim, mitik hak kau ken ke his henkik.²⁸ (Mar im him me God nipaa mit newisim mau tiwei hiram epei man. Hiram matip mar im: “Hir han kitet hirak kire mitik enuk raskel kiriak menmen enum.”)

²⁹ Mit kerek hir nan nen ein hir nititiweknaan netpiwek nar ik: “Ko! Ti mitik kerek ti ewep winak iuwe ke God ti pike eimaak me wi wikak?”³⁰ Ti ekaap hirekes ekiuwe nu tentarakit ehirp ti.”³¹ Mar im mit iuwe pris kerek newet God menmen me mit, hir netike mit ninin nertei him lo me Moses, hir nititiweknaan natipan nar ik: “Hirak kikaap mit han, te hirak kikaap hirekes taauye!”³² Ti Mitik God kehimitenit ti Mitik Iuwe ke Isrel, ti ekiuwe ehirp ti, te haiu mamrit han kitetit.” Mitikit hir newenkekikit tau niu tetikerek, hirakit tetpiwek enuk tetikeri.

Jisas nepei kaa
(Mt 27:45-56; Lu 23:44-49; Jo 19:28-30)

³³ Wepni kan kau nimin iuwe ere hinkewi, witaan toto miwapin wit yapirwe.³⁴ Nepei hinkewi Jisas kenepip him iuwe katip kar ik: “Eloi Eloi Lama Sabaktani?” Haiu meweikin him haiu matip mar im: “God kai God kai. Kenmak te ti hinaiwira eweikin sip eweto?”³⁵ Mit han nerp

¹⁹ 15:21 Ro 16:13 ²⁰ 15:24 Sam 22:18 ²¹ 15:28 Ais 53:12 ²² 15:29 Sam 22:7, 109:25; Mk 14:58; Jo 2:19 ²³ 15:33 Emo 8:9 ²⁴ 15:34 Sam 22:1

menep hir nemtewek hir natip nar ik: “Eiyimtewek. Hirak kenine Ilaija.”³⁶ ^wMitik kiutip kesiuknen ken ein keit mosong o nik me wan eik (hiram mire wum nikik), hirak kewis tipar wain mesine mekrerek, hirak kewisik kentar niyen pike kan kewetiwekek kakimisek katip kar ik: “Haiu mamir te Ilaija kaknen kaknektin Jisas kakwisik kakirp ti o au.”

³⁷⁻³⁸ ^xJisas kenepip miutip him iuwe, hirak kaa. Hirak kaa, laplap iuwe miwapin ya weipir me mit nehimitan em me God meit winak iuwe ke God meit nimin ein hiram mewep pinam pinam mau nimin mau niu ein ere men miun ti eim. ³⁹Hirak mitik iuwe kerek naanmipre mit soldia han, hirak kerp menep kir Jisas hirak kaa, hirak katip kar ik: “Mitik ik hirak Nikan ke God.”

⁴⁰ ^yMiyapir han netikerek nerp ein, te hir nerp yanimin. Maria pe wit Magdala wetike Salomi, hir netike Maria miye pe Joses ketike nikik kirak Jems hir nerp ein. ⁴¹Hir miyapir in nises Jisas me wi hirak kau keit provins Galili, hir newetiwek menmen hirak kaam. Miyapir han yapirwe nipaa netikerek nan nen wit Jerusalem nerp ein.

Mit newis Jisas kekre hei iuwe kewen kinik keit miniu (o neiyip)

(Mt 27:57-61; Lu 23:50-55; Jo 19:38-42)

⁴²⁻⁴³Maain petko matip, Josep ke wit Arimatia kan kir Pailat kentar hirak mitik iuwe hak ke kaunsil. Hirak kemerir God kaknen naanmipre mit. Hirak ap kinaain au, te hirak ken kir Pailat kitiwekhi ke herwe yink ke Jisas. ⁴⁴Pailat han kitet kar ik: “Jisas epei kaa? Ko!” Te hirak kenine mitik iuwe soldia kerek naanmipre mit soldia han, hirak kitiwekhi me Jisas epei kaa o au. ⁴⁵Mitik eik ketpiwek Jisas epei kaa, te Pailat kewis Josep kakithis herwe yink kirak. ⁴⁶Josep hirak kewir pewek keit laplap yaaam mire hike, hirak kenke Jisas yink kirak kewir laplap keweiknenik kewapinek kewisik kekre hei ke nan iuwe. Epei au, hirak keriuwet nan iuwe keiyepet hei him kirak. ⁴⁷Maria pe wit Magdala wetike Maria miye pe Joses, hir nir wit Josep kewis Jisas kiwaaairi.

Jisas pike kekrit

(Mt 28:1-8; Lu 24:1-12; Jo 20:1-10)

16 ¹Maain wi Sabat hiram epei men, Maria pe wit Magdala wetike Salomi, hir netike Maria miye pe Jems, hir neit menmen yaaam minin neiyim nen nanir Jisas nanwen yink kirak. ²Wepni kewep kan hekrit iuwe me wi Sande te hir nen hei kirak. ³Hir nepnen hir natipan nar ik: “Keimin kakinkawir nan kiwapin weipir kihi kentar nan hirak nimenuk?” ⁴Hir nen menep ein hir nikaamnaan nir nan keit pinak ein. Nipaa mitik hak keweiknik keriuwetek ken pin ein. ⁵Hir nen nipiuon hei

^w 15:36 Sam 69:21 ^x 15:38 Hi 10:19-20 ^y 15:40 Lu 8:2-3

eik, hir nen nitetik nen nimin ein. Te hir nir mitik pipiak kau yeno me pinak me his yaaim. Hirak kamir laplap nokim yaaim hiram mire hike. Te hir nehinhin han kekrit neriuwerek.

⁶Hirak ketpor kar ik: “Yi ap einaain au. Yi yinyatin Jisas ke wit Nasaret kerek hir mit newenekik kau nu tentarakit. Hirak epei kekrit kau. Hirak kepu in au. Yi eiyir yeno nipaa hir newisik kiwaairi. ⁷In ek yi eino eitip Pita ketike mit disaipel han Jisas ketpor kar ik: ‘Hi ehinini ano provins Galili.’ Maain yi eiyirek eiyit ein eiyir ke nipaa hirak epei ketpi.”

⁸Hir miyapir nen witeik nirir nen ein, hir nepirpir iuwe han kekrit neriuwerek. Hir natip mit him au. Hir ninaain nekintip nen.

Maria pe wit Magdala hire wir Jisas

(Mt 28:9-10; Jo 20:11-18)

⁹^a[Me wi Sande hekrit enum eik, Jisas kekrit kinaaiwir hei. Hirak kekrit kau wanewik, hirak kinin kewepyapir hirekes me ninaan me Maria pe wit Magdala. Nipaa hirak kepir herwe enum mar hispinak wik (7) mekrerep hiram metpaan men minaiwirep. ¹⁰Hire epei wir Jisas, te hire wen watip mit nipaa netikerek hir nariyan. Hir wen han teweninek nikitek. ¹¹Hire wen wetpor hire wirek hirak kepu, te hir nemtau him mire au.

Mitikit disaipel wik tir Jisas keit yayiwe

(Lu 24:13-35)

¹²Maain mitikit wik tirak ten wit hak tirek, te hirak keweikinhis hirekes kire mitik hak. ¹³Hirakit nepei terteyek, hirakit pike ten tatip mit disaipel han nirak, te hir nemtau him mirakit au.

Jisas katip mit disaipel nirak menmen hir enisesim

(Mt 28:16-20; Lu 24:36-49; Jo 20:19-23)

¹⁴^bMaain, hir mit disaipel nirak hiswiyen kiutip (11) nau naam menmen, Jisas kan keneri kentar hir han to enuk nepu, hir ap nemtau him me mit nipaa nepei nir Jisas. ¹⁵^cHirak ketpor kar ik: “Yi eino heriyai heriyai eirer wit wit kerek mit miyapir newi, yi eiwepyapir him yaaim mai, mit yapirwe nanimtwem. ¹⁶^dNeimin nanimtau him mai nanisesim, yi eikiri. Maain God kaktorhis, hir mit miyapir nirak. Neimin nemtau him nanisesim au, God han kitet menmen enum hir niriakem skelim mit kakinterim. ¹⁷^eMit kerek hir nises him mai, hir nanriak menmen im nankinau niuk mai. Hir nanpir herwe enum hiram mamno, hir natip him ham nipaa hir nerteyem au. ¹⁸^fHir nantenen manpen o yenmik o hir

^a 16:7 Mt 26:32; Mk 14:28 ^a 16:9 Lu 8:2 ^b 16:14 1Ko 15:5 ^c 16:15 Ap 1:8 ^d 16:16 Ap 2:38, 16:31, 33 ^e 16:17 Ap 2:4, 10:46, 8:7 ^f 16:18 Lu 10:19; Ap 28:3-6, 4:30, 5:16

nanim menmen enum menep mit, hir ap te nani au, hir nanu werek. Hir nanwis his mamantar mit hir ninap, te maain hir nanre yaain.”

God keithis Jisas ken wit kirak Heven

(Lu 24:50-53; Ap 1:9-11)

¹⁹ Mitik Iuwe Jisas ketpor epei au, God ketiwekhis ken wit kirak. Hirak ken kau menep his yaaim me God. ²⁰ Maain mit disaipel nirak hir nen heriyai heriyai nerer wit wit mit miyapir newi, hir newepyapir him me Jisas. Mitik luwe Jisas hirak kekepi hir niriak menmen yaaim kerek nipaa kerek mit nirem au. Te mit hir nertei him im mit netporem hiram yaaim.]

Mepir keremem.

§ 16:19 Ap 2:33-34, 7:55-56; Ef 1:20; 1Pi 3:22 ^h 16:20 Ap 14:3; Hi 2:3-4